

ҲАЛИМА МАЛИКОВА

ИККИ ҚАЛБ ҚИССАСИ

Қисса



Ғафур Ғулом номидаги нашриёт-матбаа ижодий уйи
Тошкент—2007

84(5У)6
М22

Маликова, Ҳалима.

Икки қалб қиссаси: Қисса. — Т.: Фафур Фулом номидаги нашриёт-матбаа ижодий уйи, 2007. — 72 б.

Ушбу қисса инсон тақдири ҳақида, бир ота-онадан туғилган икки ака-уканинг мунгли тақдири, уларнинг бошидан кечирган саргузаштлари, ораларидаги муносабатлар, қолаверса, инсоний меҳр-муҳаббат, қадр-қиммат, юрт соғинчи, жўмардлик, севги, садоқат ҳақида. Муаллиф, қиссада ўз аксини топган воқеаларни ҳақиқатга йўяди. Қиссани ўқиб, Сиз ҳам унинг «ҳақиқат» эканлигига ишонасиз, деб умид қиламиз, азиз ўқувчи.

ББК 84 (5У) 6

М М 352 (04)–2007
4702620201–92 қатъий буюртма, 2007

ISBN 978-9943-03-095-4

© Ҳ.Маликова,
Фафур Фулом номидаги
нашриёт-матбаа ижодий
уйи, 2007-й.



Сафаротада шов-шув: боломоноталик Жўра мерган-ликда ном чиқарибди эмишки, кўзгуга қараб орқасидаги алқорни нишонга олармиш. Бу миш-миш бирпасда қўшни қишлоқларга ҳам ёйилди.

Нима бўлди-ю, ана шу мерганнинг оти йўқолди. Мерган отини излаб тоғ ва қирлар ошиб Сафаротага келиб қолди. Тоғда гиёҳ териб юрган сарвқомат, қошу кўзи қоп-қора, сочлари толим қизга кўзи тушди-да, беихтиёр унга пешвоз юрди. Қиз йигитни кўрди, лекин кўзларини олиб қочди. Яқин атрофда қизнинг акаси Бобохол мол боқиб юрган эди, бегона йигитга кўзи тушиб, унга яқин келди ва:

— Кимсан, бу ерларда нима қилиб юрибсан? — деб сўради.

Жўра, кимлигини ва йўқолган отини излаб юрганини айтди.

— Э-ҳа, сен ўша Жўра мерганмисан? Гапинг ростми, ишқилиб?

— Ишонмасанг, исбот қилай.

— Қани, исботла бўлмаса! — Бобохол ишонқирамай мерганга анча нарида, тош устидаги қушларни кўрсатди.

Жўра мўлжал олди. Қушлар гур этиб ҳавога кўтарилди, лекин бирови питирлаб қолди.

— Қойил! — ҳайратини яширмади Бобохол. — Ишондим, ҳақиқий мерган экансан. Энди бизникига юр, меҳмонимиз бўл.

Жўра шошиб турган бўлса-да, қизнинг уйини кўриш, акаси билан дўстлашиш илинжида Бобохолга эргашди. Улар сойга энганларида, Бобохол орқасига қараб:

— Ҳожарой, сен ҳам уйга қайтсанг бўларди, — деди. Бу мерганга қизнинг исмини билиб олишга қўл келди. «Исми Ҳожарой экан», деб бир энтикиб қўйди Жўра.

Бобохолларнинг уйи тоғ этагида, соя-салқин, дарахтлар билан ўралган. Айниқса, уларини энлаб оқадиган сойнинг шовуллаши қўнгилни яйратади. Тепадан қараган кишига уйнинг томи кўринади, ёнлаб қарасангиз, фақат дарахтзорни кўрасиз. Эртадан кечгача ҳовли саҳнига тангадай офтоб тушмайди. Ёзнинг чилласида ҳам бу ҳовли салқин, қишда эса тоғ бўронларини қалин дарахтлар тўсиб туради. Дарахтларнинг аксарияти мевали. Шу боис хонадон дастурхони қишинёзин тансиқ меваларга тўла...

Ҳовлига кириб келишганда, эгар йўнаётган чол беихтиёр бошини кўтарди. Бобохол отаси — чолга меҳмон йигитни таништирди.

— Кимнинг улисан? — деб сўради чол Жўранинг саломига алик олиб.

— Мўмин мулланинг, — деди Жўра.

Чолнинг чеҳраси очилди.

— Э, ошнамнинг ули экансан-ку! Охирги пайтларда борди-келдимиз узилиб, юз кўрмас бўлиб кетдик. Қаричиликда, узоққа юролмаскансан киши. Олдинлари тез-тез кўришиб турардик.

Чол меҳмон йигит билан бағирлашиб кўришаркан, Ҳожарой бир қучоқ гиёҳ кўтариб ичкарига ўтиб кетди. Жўранинг кўзи ўғринча уни кузатиб қўйди.

— Эшитган чиқарсан, мени Мамаюсуф табиб, дейишади, — деди чол меҳмонни ичкарига таклиф қиларкан, ўзи олдинга тушди. — Энди қаридик, одам кўролмайдиган бўлиб қолдим. Ота касби йўқолиб кетмасин, деб табибчиликни қизимга ўргатяпман. Умрини берсин, жуда зийрак чиқиб қолди. Тоғдан гиёҳ териб, ўзи малҳам тайёрлайди. Сизларникига кўп борардим. Бир борганимда, ўспирин бола эдинг, мана энди битта-бинойи йигит бўлибсан. Сен ҳақингда эшитганим бор.

Лекин ошнамнинг ули эканлигингни билмасдим. Ум-ринг зиёда бўлсин!

Чол давра олиб ўтирганларида ҳам анча ҳангома-ларни эслади. Меҳмоннинг «қўйинг-қўйинг»ига қара-май, Бобохол ширвоз сўйиб, қозон осди. Хожарой уни тобида қовуриб дастурхонга қўйди. Гурунг яна анчагача давом этди. Охири Жўра мерган қайтишга изн сўради.

— Отимни излаб юриб эдим. Қоронғи тушмай изим-га қайтай деган эдим...

— Йўлингни берсин! — чол Жўрани узоқ алқади...

Қўлдош мерганнинг ўғли Мўмин ота изини босма-ди. Қўлдош мерган ўғлини Самарқанддаги мадрасага олиб бораман деганида:

— Э-ҳе, Самарқанд қаёқда-ю Фориш қаёқда! Шун-ча узоқда ўқиш жоизмикан, — дегувчилар топилди. Ле-кин мерганнинг ўжарлиги бор эди, хуржуннинг икки кўзини тоғ неъматларига тўлдириб, ўғлини қаватига олиб, «қайдасан Самарқанд» деб йўлга тушди.

Йўлда Ёдгор бўласининг уйига қўниб, сахарлаб яна йўл танобини олди. Эртаси кечга яқин Самарқанд шаҳ-рига кириб келди. Дуч келган биринчи уйнинг эшиги-ни қоқди, бир кечага жой сўради. Учинчи кунни эрта-лаб мадрасага борди...

Ўғил тўрт йил мадраса остонасини ялади. Шу йил-лар ичида Қўлдош мерган кўп бор ўғлидан хабар олиб, унга совға-салом олиб келиб турди. Мўмин мадрасани хатм қилиб, қишлоққа қайтди ва ёш бўлса-да, тоғлик-лар орасида «Мўмин мулла» номини олди.

Мўмин ўғил кўрди. Қўлдош мерган неварасига Жўра-бой исмини берди. Бола ақлини танибдики, бобосига меҳр қўйди. Онасига инжиқлик қилса-да, бобоси кучо-гида ҳаловат топарди. Бундан бобонинг завқи тошарди ва неварасини қаёққа борса ўзи билан олиб юрар, бола ҳам шўхлик қилмай бобосига эргашарди. Жўрабой

мерганликни бобосидан ўрганди. Жўрабой «мерган» бўлиб танилганда бобонинг бўйи бир қаричга ўсди:

— Шукур, меҳнатим зое кетмади, ўлмайдиган бўлдим! — мақтаниб қўйди жўраларига...

Жўрабой уйга қайтгач, Ҳожарой ҳақида янгасига гап очди. Турган гапки, янгаси акасига айтди, акаси ота-онасига етказди. Отанинг кўнгли кўтарилди. Ўғлининг қадрдон ошнасининг қизига кўнгил бергани табиий ҳол, отани хурсанд қилган эди-да. Бўлар ишни орқага суриб ўтиришмади. Орадан ҳафта ўтмай, Мўмин мулла йўрға отнинг бошини ошнасиники томон бурди. Мамаюсуф табиб ошнасини кучоқ очиб кутиб олди.

Ош-овқатдан кейин «элчи» — Мўмин мулла қимтиниб:

— Қани, менга айт-чи, шу қизингни боши очиқми? — деб сўради табибдан. Табиб бошини соллантириб кулди ва:

— Ҳўп, очиқ бўлса, нима қилардинг? — деб луқма ташлади.

— Келин қилардим, — деди мулла дабдурустан. Табибнинг кўнглидан ҳам шу гап ўтиб турган эди, гапни чувалаштириб ўтирмади...

Сафарота ва Боломонота қишлоғидаги тўйнинг овозаси қўшни қишлоқларгача етиб борди. Жўрабой билан Ҳожарой бир ёстиққа бош қўйди. Орадан йиллар ўтиб, улар икки ўғилнинг ота-онаси бўлишди.

Жўра мерган ёзда Чадакдаги дала боғда турар, кунлар совигач Боломонотага кўчарди. Шундай кўчишларнинг бирида Мерган мол-қоллари, идиш-товоқларини катта ўғли Рўзибой билан олиб қайтди. Уларни қўйиб, энди аёли билан кичик ўғлини олиб келишга кетди. Ёнида бодомчадан ясалган сўйил ва кўрпа-ёстиқларни боғлаш учун арқон бор эди. Тоғдан ўтаётганида унга бўри илашди.

Мерган арқонни ерга судраб кетаберди. Бўри арқондан ўтолмай тишларини ғижирлатганича эргашаверди. Бўри оч, бундай пайтда бўрилар қочмайди. Мерган қадмини секинлатди, оч бўри унга яқинлашди. Асл мер-

ган ҳамиша имкон топади-да. У пайт пойлаб бўрининг пешанасини мўлжаллаб сўйил серпади. Бўри мувозанатини йўқотиб, пастга қулади.

Ҳаво тўсатдан совиди. Ҳадемай қор ёғиб, довондан ўтиш қийинлашади. Тезроқ ҳаракат қилиш керак. Боломонота билан Чадак ораси яёв юрганда икки соатлик йўл. Кўч-кўрон билан бир оз оғир кечиши табиий. Мерган таваккал йўлга чиқди. Чамаси йўлнинг ярмида бўрон бошланди. Совуқ юзларни чимчилаб, вужудларни аёвсиз исканжага олди. Текисликда ҳаво айниб, ёғингарчилик бошлангунча икки соат вақт ўтди. Осмон бир зумда қоп-қора булутлар билан қопланди. Қор қалинлашган сари юриш қийинлашди. Атроф зим-зиё. Йўловчилар қаёққа боришаётганини билишмайди. Улар адашишди. Орқага қайтишнинг иложи йўқ, йўлнинг ярми босиб ўтилган. Кичкина Ниёзбекни йўтал тутди. Ҳожарой бўрондан пана жойга кигиз тўшади. Устидан уч-тўрт қават кўрпа, орасига боласини ётқизди. Кўрпа устидан гилам ёпиб, қор билан бостирди, сўнг ўзи ҳам боласи ёнига кириб ётди.

Мерган ёлғиз йўлни давом эттирди. Жуда бўлмаса яқинроқ бирор уйга етиб олишни мўлжаллади. У чамаси анча йўл босди ва бир вақтлар одам яшаган, ҳозир бузилиб чордевори қолган харобадан чиқиб қолди. Шу харобадан қарама-қарши томонга озгина юрса, жиянининг уйи бўлиши керак. У мўлжални тўғри олган экан, олдиндан пастаккина уй чиқди. Эшикни очган уй бекаси «тоғажон»лаб қолди.

Ташқарида шамол увиллар, бўроннинг кучи гўё уй томини кўчиргудай. Мерган чўғ солинган сандалга суқилиб, босиб-босиб иссиқ чой ичди, кейин воқеани сўзлаб берди.

— Бундай бўронда уларни олиб келиш хавфли. Бўрон тингач топиб оламиз, — деди куёв. Жиян сариёққа қориб атала пиширди ва уни кадига солиб ўрагунча бўрон тинди. Тонг ота бошлади. Тонг ғира-ширасида Ҳожарой билан Ниёзбекни топиб олишди...

Бу воқеа уларнинг ёдида узоқ вақт қолди. Орадан йиллар ўтди. Жўра мерганнинг қўй-қўзилари кўпайиб, мол-давлати зиёда бўлди. Катта ўғли Рўзибойни ўз қишлоғилик Раҳмонбердининг қизига уйлантирди. Кичик ўғли Ниёзбек ўспирин ёшига етиб, ақлли ўқтамлашди...

Ниёзбек бомдодни ўқиб бўлгач, эндигина ором олаётган аёлига меҳр билан боқди.

— Туни билан Бектош иситмалаб ухлатмади. Тонгда ухлаб қолибди, бояқиш.

Ниёзбек она-болани уйғотиб юбормаслик учун ўрнидан оҳиста қўзғалди.

Ўзи Бектошнинг туғилиши анча ташвиш келтирди. Ниёзбек билан Шарофат турмуш қуришгандан етти йил ўтиб иккита қиз кўришди. Учинчи фартзанд — Бектошга ҳомиладорлик оғир кечди. Она мой ҳидига кўнгли беҳузур бўлар, уйларида пиширилган ёғли овқатларни деярли еёлмасди. Қўшни ўчоқда қозон осилганини кўрса кўнгли суст кетиб, қараб қоларди.

Бир куни Шарофат бир коса мой билан қўшнисиникига чиқди.

— Ҳа, келинжон, нима кўтариб юрибсиз? — деди қўшни аёл.

— Ўзим пиширган овқатни еёлмаяпман. Сизни овқат пишираётганингизни кўриб, шундан ичай деб чиқувдим, — деди Шарофат истиҳола билан қўлидаги мойни қўшни аёлга узатиб.

— Вой, ўргилай келинжонимдан, жерикмисан, дейман? Ҳозир яхши кўрган овқатингни пишириб бераман, — деб аёл Шарофатни хижолатпазликдан қутқариш учун уни алқади. — Ҳозир овқат эмас, кир ювиш учун сув иситаётган эдим.

Шарофат бўшашиб қолди, кўзларида ёш милтиллади. Хижолат тортиб уйига қайтди. Қўшни бир оздан сўнг бир товоқ овқат кўтариб чиқди. Шарофат гўё бир йилдан буён тузукроқ овқат емагандек товоққа ёпишди.

— Тавба, шунақасиям бўларканда, — деди Шарофат ажабланиб. — Иккала қизимда жерик нима, кўнгил

айниши нима, билмабман. Буниси нима бало бўлди, жудаям қийнаб юборди-ку!

Шунда қайнаси:

— Ҳай, болам, ҳали дунёга келмаган гўдакни «бало» демагин-а! — деди. — Зарда бўлсанг, демак, болангни сочи қуюқ бўларкан. Оз қолди, қутилиб олсанг кўрмагандай бўласан. Ҳеч қачон ношукурчилик қилма!..

Туғишда доянинг ҳам эсхонасини чиқариб юборди. Бутун қишлоқ аёлларига бир ўзи доялик қилган Хадича кампир «эплай олмаяпман», деб қаватига бақувват аёлни чақиртирди. Иккаласи Шарофатни кўрпага ўраб, у ёқдан-бу ёққа думалатишди. Икки кеча-кундуз дард чеккан аёл батамом ҳолсизланди. Доялар шошди, Ниёзбекнинг олдидан ўтишди. Хавотирга тушган қайната кўчқорни жонлиққа, деб қон чиқазди. Киндигига ўралиб туғилганигами ёки ҳаяллаб туғилганигами, чақалоқ йиғламади, бутун бадани кўкариб кетди.

Хадича кампир ўттиз йилдан буён доялик қилар, тажрибаси катта эди. У гўдакни киндигини кесмай, ўзига сидирганди, бола пиқиллаб овоз чиқарди, сўнг йиғлаб юборди. Боланинг юзига ранг югургач, доянинг кўнгли тинчиди.

Янги чақалоққа Бектош исмини беришди. У касалманд, инжиқ бўлиб ўсди. Тўртга кирганида она яна ҳомиладор бўлди. Бу сафар ҳомиладорлик осон кечди, қийналмади. Ёз куни, супада жой қилиб ётишаркан, Ниёзбек кўкдаги юлдузларга термилиб:

— Онаси, ҳув, ярқираган юлдуз меники, сен ҳам ўзингга юлдуз танлагин, — деди.

— Ҳадемай тўрт боланинг отаси бўласиз-у, худди ёш болаларга ўхшайсиз-а, — деди аёли.

— Нима, отам бор, отамнинг отаси бор, демакки, мен уларнинг олдида ёш боламан-да, — деди Ниёзбек кулиб.

Шу пайт Бектош йиғлаб қолди. Ота болани бағрига босди. Ниёзбек қизларини бирор марта қўлига олмаган. Ота-онаси бор эрлар биринчи, баъзилари умуман бо-

лаларини кўтаришмайди. Одат шу, эр ота-онаси ёки ёши улуғлар олдида фарзандини қўлига олмайди.

Шарофат туш кўрди: осмондаги тўлин ой унинг қўйнига кирган эмиш. Чўчиб уйғонди-ю, у ёқ-бу ёғини сийпалади. Қўлига ҳеч нарса илинмагач, осмонга юзланди. Осмонда юлдузлар жилваланиб турарди. У ёнбошига қаради, эри ҳам, ўғли Бектош ҳам ухлаб ётишибди. Тоғ табиати қизиқ, айни ёз чилласида ҳам кечалари салқин, ҳур-ҳур шабада этни жунжиктиради. Шарофат эри билан ўғлининг устига кўрпа тортиб, ўзи ҳам уйқуга кетди...

Шарофат сигирни соғиб, ширчай тайёрлаш учун ялпиз томирини оламан, деб ариқ бўйига борди. Чўп билан ковлаб ялпизнинг ажриқсимон томирларини олиб, сувга чайди, сўнг уни қозонга солиб қайнатди. Атрофга хушбўй ҳид таралди. Бир пиёлача сув қолганда қозонга икки коса сут қўйди. Ширчай қайнагунча ко-саларга нон тўғраб сарёғ солди.

Ширчай дастурхонга тортилганда, қўшни ҳовлидан аёл кишининг қарғиши эшитилди:

— Ҳэ, оғзингдан қонинг келсин, сен молга келган мол оёқни, келинни оёғидан деганлар, сен келгандан бери иккита молим ҳаром ўлди!

Қўшни кампирнинг қарғишига келиннинг жавоби янгради. Лекин «жавоб» унсиз эди.

— Ҳа, молга келган мол оёқ бўлмай, нимасан?! Молим бор учун сени келин қилганман. Молим бўлмаса, есир хотиндай етаклаб келаверармидик!

— Бугун ҳам жанжал. Туф-туф-е, кўз тегмасин, мен қайнанам билан ҳеч айтишмаганман, — деди Шарофат.

— Ҳа, бу онамнинг яхшилигидан, бўлмаса сизлар ҳам ит-мушук бўлиб юрардинглар, — деди Ниёзбек мийиғида қулиб.

— Ҳеч-да, келин бўлиб бирор марта қайнанамга гап қайтармаганман. Ҳамма айтганларини жим эшитганман, — қўшиб қўйди Шарофат.

— Шунинг учун сени яхши кўраман-да, — ҳазил қилди Ниёзбек.

Шу куни Ниёзбекникига меҳмон ёпирилди. Қайната-қайналар келишди. Устига-устак қўшни қишлоқлик Аҳмад ўжар деган амакилари ҳам келди. У киши ўжар деганича бор эди, тутган жойидан кесадиганлардан. Гурунг устида беш ёшга тўлган Бектош пайдо бўлди. Аҳмад ўжар уни даст кўтариб эркалади ва:

— Мендек ували-жували, ўжар бўлгин, — деб оғзига туфлади. Форишда шундай одат борки, гўдакнинг оғзига ким биринчи бўлиб туфласа, шу гўдакнинг хулқ-атвори ўша одамникидек бўлар эмиш. Шарофат бу тилакка дарров кашталиқ бир белбоғни олиб чиқиб:

— Илоҳим шу ўғлим сизнинг ёшингизга етсин. Сиздай соғлом бўлсин! — деб амакининг олдига қўйди. Ўжарнинг тилаги Ҳожарбибига маъкул тушмади.

— Майли, умри ўхшаса-да, феъли ўхшамасин, — деди у ва қўшиб қўйди: — Қишлоқда урушмаган одамнингиз қолмаган бўлса керак?

— Ҳа, энди қўяверинг, — деди Аҳмад ўжар тиржайиб...

Меҳмонлар кетгандан кейин ҳам эр-хотин ўртасида Аҳмад ўжарнинг гапи давом этди.

— Ойим тўғри айтдилар, ўғлимиз ўжар бўлиб ўсасанми? — деди Шарофат.

— Қўявер, онаси, Аҳмаднинг ёшига етиб, ўзидан кўпайиб юрсин. Йигит деганнинг озроқ ўжар бўлгани ҳам яхши, лаллайгандан кўра, — деди Ниёзбек.

— Ўша Аҳмад ака ёшлигида ўғрилиқ ҳам қилган, деб эшитганман, ростми шу?

— Рост, ўғрибоши бўлган. Лекин мард бўлган. Бир аёл сабаб ўғрилиқдан қўлини ювган.

— Ўғрининг ҳам марди бўларканми?

— Ишонмайсанми, эшит бўлмаса, — ҳикоясини бошлади Ниёзбек. — Кеч куз, дарахт барглари сарғайган, ҳаво анча салқинлашган. Тун. Эл ширин уйқуда. Ўғрилар қопларидан болта, теша олиб ишга тушишади.

Ана-мана дегунча девор тагидан тандирнинг оғзидек лаҳим очилади. Ўғрилардан бири ўша лаҳимдан бошини чиқарганда, ҳовлидаги ит унга ташланади. Ўғрилар вазиятни олдиндан билгандай лаҳим оғзига қопни тутиб туришади. Ит ўзини лаҳимга урганда, ўғрилар чаққонлик билан унинг бошини қопга ўраб олишади. Хавф бартараф бўлгач, эҳтиёткорлик билан лаҳимдан чиқиб, уйга киришади. Уй эгасининг бадавлатлиги ҳовли деворидан маълум эди. Бу қишлоқнинг кўзга кўринган бойи — Муробидхўжанинг ҳовлиси эди. Бой бир йил олдин бандаликни бажо келтирган, ҳовли тўққиз ёшли ёлғиз ўғилча билан Гулнорбону исмли хотинининг ихтиёрида қолган. Гулнорбону бу вақтда ўғлини ухлатиб, ўзи чироқ шуъласида кашта тикиш баробаринда ғамли кўшиқни хиргойи қиларди.

Эшик тўсатдан очилади-ю, аёл сесканиб кетади. Унинг рўпарасида юзига ниқоб тортилган уч киши турарди. Аёлнинг ичида ваҳима бўлса-да, пинагини бузмай каштасини тикаверади. Бақирмайди. Бақирса, ўзи ҳам, ўғли ҳам пичоқ дамида учади. Шунинг учун ўзини қўлга олиб, ишини давом эттиради. Бундан фойдаланган ўғрилар уйдаги кийим-кечакларни, сандиқдаги нарсаларни тугунлаб чиқиб кетишаркан, талончиларнинг бири деворга илинган этикка қўл чўзади ва шу пайт аёл ўрнидан сакраб туради.

— Эй, ноинсофлар! Ўғри мард келади, дегувчи эди. Шунча нарсани олдиларинг, аёл бошим билан бир нима демадим. Эримдан қолган ёлғиз хотира — этикка ҳам кўз олайтирдингларми? Мард бўлсаларинг, этикни жойига илиб, чиқиб кетларинг! Мабодо этик керак бўлса, аввал мени ўлдиiringлар, сўнг уни олакетинглар! — дейди Гулнорбону.

Босқинчилар аёлнинг мардлиги, шижоати ва вафодорлигига тан бериб, бу уйдан қуруқ чиқиб кетишади. Ана шу тўданинг бошлиғи Аҳмад ўжар бўлган. Шу воқеа сабаб у тўғри йўлга кирган экан...

Ниёзбек косибчилик қиларди. Унинг иш юритадиган ҳужраси кичкина бўлиб, ерга кийгиз тўшалган, чеккароқда қалин пўстак, девордаги бир неча ёғоч қозиқларда жуфт-жуфт махсилар илинган, хонага кирган кишининг димоғига тери ҳиди гуп этиб уриларди. Ниёзбек бу ҳидга кўникиб қолган эди. Отаси Жўра мерган ҳам косибчилик қиларди. Бу ишни у кексайганда ихтиёр этди ва ўғлини ҳам шунга ўргатди.

Ниёзбек бомдодни ўқиб, хотинига тайинлади:

— Пирхонага етти чўзма пиширинглар, умидворларга, — деди. У иш ҳужрасини «пирхона» дерди.

— Ширчай тайёр, келинг, — деди Шарофат. Ниёзбек ўтирди ва отасининг олдидаги ширчай тўла косага пичоқ билан нон тўғраётганини зимдан кузатди, ўзи ҳам ширчайга қўл чўзди.

— Ўғлим, — деди Жўра бобо пахтадек илвираган нонни оғзига соларкан, — бугун ё эртага Эшон бобомлар келар эмиш, айттириб юборибдилар. Биласан, биринчи бўлиб бизникига кўнишади. Шунинг учун дурустроқ совлиқ ажратиб қўй, — дея тайинлади.

— Хўп бўлади, ота, — деди Ниёзбек.

Айтилгандек, тушдан кейин икки муриди билан Эшон бобо хонадонга кириб келди. Меҳмоннинг дарagini эшитган қариндош-уруғ, кўни-қўшни Ниёзбекникига йиғилишди. Қўй сўйилиб, қозон осилди. Зиёфат қуюқ бўлди. Ошхонада сув тугаб, Шарофат ҳовуз томон юриб, тўхтаб қолди. Кечаси ҳовуз атрофида жинлар базм қилармиш, парилар сочини ювармиш, деб эшитгани учун ҳам тўхтаб қолди. Орқага қайтмоқчи бўлди-ю, «ахир Эшон бобо учун сув олаяпман-ку, пирлари зарар етказмас», деган ўй билан илдам юрди. Кечаси ой нурида ҳовуздаги сув қорайиб кўринади. У бу ҳолни кўриб, сесканди, кўлидаги пақирни ҳовузга ботираар экан, сувдаги ўз аксини кўриб, «паримикин» деб кўрқди. Қўрқа-писа қуйидаги байтни такрорлади:

Сувга келдим, Сулаймон,
Сиздан мадад тилайман.
Уйимга эшоним келди,
Таҳоратга сув тилайман.

У хазонларни гижирлатиб босаркан, назарида орқасидан паримомо келаётгандек, қадамини тезлатди. Шарофат оғироёқ ҳолида бир ўзи сувга борганига «Эшон бобо учун бордим, ўзи қўллайди, зора қийналмай осон кутулсам», деб ният қилди.

Гурунг ярим кечасигача давом этди. Кимдир Эшон бободан сўраб қолди:

— Кўз текканда нима қилиш керак? Кўз тегмаслик учун-чи?

Эшон бобо бир оз ўйланиб турди-да:

— Мен бир воқеани айтиб бераман, — деди. — Бир қишлоқда кўзи ўткир одам яшаган экан. У бирор ўсимликками, одамгами, ҳайвонгами «мунча зўр экан», деб тикилса, ўша нарсага зиён тегаркан. Бир куни у чой ичиб ўтирганда кўчадан семиз от минган ҳамқишлоғи ўтибди. «Бай-бай, оти зап етилибдими», деб бир тикилибди ва орадан бир оз фурсат ўтгач, қўлига пул бериб, отлиқнинг уйига ўғлини жўнатибди.

— Ўғлим, фалончининг уйига бориб икки кило от гўштидан олиб кел!

Ҳеч гапдан хабарсиз ўғил ўша отлиқнинг уйига бориб, қуруқ қайтибди. Шунда отаси ажабланиб:

— Оббо, бачағар-ей, отигами, ўзигами седана қадаган экан-да, — деган экан... Бундан ўзларингиз хулоса чиқариб олаверасизлар...

Жўра бобоникидан деярли меҳмон аримасди. Ниёзбек хизматда бўлар, меҳмонларнинг суҳбатига кулоқ тутарди. Шундай суҳбатларнинг бири Сафаротадагиларнинг келиб чиқиши ҳақида бўлди.

— Бунинг тарихи узун, — дея салмоқлаб гап бошлади саксонни қоралаган Ғани бобо. — Бундан уч юз

йилларчами илгари Хоразм томондаги бир қишлоқдаги одамларни қирғин-барот, хотин-халаж ва қизларни эса банди қилишган. Омон қолган ўттиз чоғли хонадон кўч-кўрони билан қишлоқдан чиқиб кетган ва қаерни лозим топишса, ўша жойда яшашган. Уларни қувишса, бошқа ердан макон топишган. Шу-шу, уч йил деганда шу ерлардан қўним топишган. Лекин ота маконларидан умид узишмаган. Ҳар йили икки-уч йигитни хабар олгани ота маконлари — Хоразм ерига юборишиб туришган. Йиллар ўтиб, ерларни босиб олган хон барҳам топган, одил хон тахтга ўтирганини эшитиб, булар ҳам юртларига қайтмоқ ниятида йўлга тушишади. Тоғдан ошаётганларида от устидаги юклар ичидан элак тушади. Кимдир уни туяга юклайди. Атайлаб қилгандай туя мункиб кетади-да, оёғи синади. «Туя элакка қолганда оқсайди», дегани шундан келиб чиққан бўлса, ажаб эмас. — Фани бобо томоғини ҳўллаб олгач, ҳикоясини давом эттирди: — Туя лат егач, устидаги нарсалар олинади. Бошқалар йўлни давом эттиришса-да, лат еган туянинг эгаси Қурбонбой иложсиз қолади. Унинг икки боласи ва хотини ҳам бор эди. Жигарини ташлаб кетишга кўзи қиймаган Қурбонбойнинг амакиси Ҳайитбой ҳам оиласи билан шу ерда қолади. Ҳайитбойнинг қарамоғида олти киши: аёли, икки ўғли, келини ва бир қизи бор эди. Улар туянинг оёғи тузалгач йўлга тушишмоқчи эди. Афсуски, туя тузалгунча тоғга совуқ тушади. Совуқда туянинг синган оёғи тузалиш ўрнига баттар бўлади ва уни сўйишдан бошқа чора қолмайди. Туя гўшти тузланади.

— Бор-йўғи икки оила бўлсак, гўшт кўп, ҳидланиб қолмаса эди, — деб хавотирланишади. Лекин тоғнинг ҳавоси туфайли гўшт майиздек қурийди. Бу мўъжизани кўриб:

— Бу ернинг ҳавоси шифобахш экан, — дейди Қурбонбой ва эркаклар тошдан уй қуришга киришади, аёллар қишга деб ўтин ғамлайди. Шундай қилиб, икки оила шу ерда қолишади. Йиллар ўтиб ўғил-қизлари воёга етади, уларни бир-бирига никоҳлаб қўйишади ва

кейинчалик қўшни қишлоқлардан келин олиб, қиз бериб, катта қишлоққа айланишади...

Бир куни Қурбонбой билан Ҳайитбой ўзаро дардлашади:

— Ёшимиз бир жойга борди, ўзимиз ҳам, болаларимиз ҳам бу ерга ўтириб қолдик. Энди элимизга кетсак бўлармиди, — дейди Қурбонбой ва маслаҳатни қилиб, икки йигитни Хоразм элига юборишади.

— Хабар олиб келинглар-чи, элимиз тинч эканми? Тинч бўлса, кўчиб борайлик...

Икки йигит «Хоразм қаёқдасан», деб йўлга тушади ва икки ой деганда Хоразмга боришади. Таниганлар уларни кўриб хурсанд бўлади. Навбати билан меҳмон қилишади. Меҳмондорчилик кунларида йигитлардан бири ташқарига чиқади-ю, шу хонадон қўшниларининг гурунгини эшитиб қолади.

— Қўшниникига келган меҳмонлар ким? — деб сўрайди бири иккинчисидан.

— Келгиндилар-да, — дейди иккинчиси.

— Келгинди дегани нимаси, тушунтириб гапирсанг-чи?

— Аллақайси тоғдан келган келгиндилар-да.

Уларнинг гапини эшитган йигит ўзича «бу ердагилар учун биз келгинди эканмиз-да», деб ўйлайди ва эртасига қайтиш тараддудига тушишади.

— Қоламиз деган эдиларинг-ку, нега тез қайтаяпсизлар? — деганларга:

— Ҳадемай совуқ тушади, кун яхшилигида уйимизга етиб олсак, — дея узр-маъзур қилишади. Шу-шу, улар ҳозирги Сафарота қишлоғида абадий қўним топишади. Ана шунақа гаплар, — дея Ғани бобо ҳикоясига якун ясаркан, бир сўлиш олиб қўшимча қилди: — Сафароталикларнинг асл авлоди Хоразмдан тарқаган, деган гапларда жон бор...

* * *

Рўзибой эрталаб молларга ўт солиш учун оғилхонага кириб ҳанг-манг бўлиб қолди. Эт битиб қолган новвос жойида йўқ. У из олиб ҳовлига, ҳовлидан кўчага

чикди. Из кенг далага томон кетган. Уйи қишлоқ чеккасида бўлгани учун нарида бошқа уй йўқ. Чақирсанг товуш етадиган жойда қўшни қишлоқ. Эҳтимол, новвос қўшни қишлоққа кетгандир? Рўзбой уйга кириб ис-сикроқ кийиниб чикди. Қишлоқ яқин бўлса-да, совуқ забтига оларди. Рўзбой биринчи уйнинг эшигини қокди. Уй эгаси Ўроқбой бир оз саросимага тушди.

— Ўроқбой иним, новвосимиз йўқолиб қолди. Мабодо даладаги молларингизга қўшилиб сизникига келиб қолмаганмикин, деб келган жойим, — деди Рўзбой минг истиҳола билан.

— Йўқ, кечқурун молларни ўзим оғилга олиб кирдим. Уларнинг орасида бегона мол йўқ эди.

— Новвоснинг изини олиб келдим, ўзимча келганим йўқ, — деди Ниёзбек. — Балки сезмай қолгандирсиз, оғилингизга бир қарайлик.

Рўзбой ичкарига бир-икки қадам қўйгач, Ўроқбой унинг йўлини тўсди.

— Кўрмайсан, молингни бошқа жойдан изла! — жеркиб берди у.

— Гапинг рост бўлса, нега ичкарига қўймайсан? — бўш келмади Рўзбой.

Бу машмашанинг устига қўшнилар чиқиб қолди. Ўроқбой довдиради.

— Майли, кириб кўринглар, — деди. Кириб кўришса, оғилда бир сигир ва иккита хўкиз турибди. Кирганлар қон ва гўшт ҳидини олишди. Молхона тўрида янги тупроқ ёйилган. Рўзбой кетмон билан ўша жойни ковлай бошлаганда, Ўроқбой типирчилаб қолди.

— Нега молхонани ковлаяпсан? — дея кетмонга ёпишди.

Бу вақтда бир-икки қарич кетмон ботган ердан қон аралаш лой чиқди.

— Хўш, бу нима? Бу ерда мол сўйилган, қон ҳиди анқияпти!

Ўроқбой: «Икки кун олдин ўзимнинг молимни сўйган эдим», дея баҳона қилмоқчи эди, икки қўшнисидан уялди ва ноилож тақдирга тан берди.

— Кечиринглар, гумроҳлик қилдим, ўша молингиз ўрнига иккита новвосимни олиб кетинг! Фақат шарманда қилманг! — Рўзибойнинг этагига ёпишди Ўроқбой.

— Биттаси ҳам етади, — деди Рўзибой паст кетмай. — Молимнинг ўрнига ўрин бўлса бўлди...

Илонни иккига бўлиб юборсангиз ҳам қимирлаб кетаверади. Ўроқбой ҳам шунақа хилидан эди. У ичида: «Сеними, шарманда қилганинг учун ўчимни олмасамми!» деб қўйди. Чунки Рўзибой индамай кетса-да, бу воқеадан икки қўшниси хабардор бўлди, энди бутун қишлоқ билади. Илгари шубҳа остида эди, гувоҳлари бўлмагач, тутиб олишолмасди, энди-чи, сири фош бўлди. Шу пайтгача йўқолган молларнинг гумонига қолди.

Ўроқбой ўз қилмишидан қишлоқда бош кўтаролмай қолди. Бунинг учун Рўзибойдан ўч олиш пайига тушди ва қорбўрон кунларнинг бирида Рўзибойнинг оғилига кириб, сигир ва бузоқчасининг қорнига бир неча бор пичоқ санчиб, кўздан ғойиб бўлмоқчи бўлди. У қор изимни ёпади деб ўйлаган эди, лекин оғилдан чиқса, қор тинган. У довдираб қолмади ва икки юз-уч юз қадамча йўлни тескари босиб ўтди...

Рўзибой бу сафар тамоман анқайди. Икки қорамол узала тушиб, ўлиб ётибди. Кун ёришгач, қўни-қўшнью оғайнилар келишди. Турли тахминлар ўртага ташланди. Қордаги изга қараб:

— Тўхтанглар! — деди қишлоқ оқсоқоли Фулом ота. — Ҳеч ким бу ерга келмаган, аксинча, кимдир бу ердан чиқиб кетган.

— Тўғри, кимдир нариги томондан келган, — чувиллашди йиғилганлар.

— Гап бундай, — деди Фулом ота, — изга яхшилаб эътибор беринглар. Биттанг дала томонга бироз юргин. — Кимдир дала томонга йигирма қадамча, кейин бир-икки қадам ёнга, сўнг орқачасига юриб ўтган масофасини босиб келди. Шундан кейин Фулом ота ҳаммани изга қаратди. — Изга қаранглар, Содиқ олдинга қараб юрганда оёқ учи томондаги қор олдинга, орқага юрганда

қор товон томонга тушган. Энди анави изга қаранглар, товон томонга қор тушган ва босилган из ҳам товон томон эзилган. Демак, кимдир орқаси билан юриб кетган.

Оқсоқолнинг гапидан кейин Рўзибой икки норғул йигитни қаватига олиб, сохта изни мўлжаллаб йўлга тушди. Из Ўроқнинг эшигида барҳам топди. Демак, айбдор топилди.

Эшиги олдидаги гала-говурни эшитган Ўроқнинг ичига олов тушди. Кийиниб орқа эшикчадан чиқиб кетаркан, хотинига, сўраганларга «уйда йўқ эдилар, дегин», деб тайинлади.

Келганлар аёлнинг гапига ишонмай ичкарига киришди ва орқа эшикчанинг очиқлигини кўриб, Ўроқнинг қочганини билишди. Унинг орқасидан қувишнинг фойдаси йўқлигини фаҳмлаб, қишлоқ оқсоқолини чақирди.

Оқсоқол воқеадан хабардор бўлиб, қўшни қишлоқда яшайдиган Ўроқнинг икки укасига одам юборди, уларни чақиртириб олди ва бўлиб ўтган воқеани уларга баён этди. Икки ука елка қисди:

— Бизнинг айбимиз нима? Жиноятни биз қилмаганмиз-ку, — дейишди. — Жиноятни акамиз қилибдими, жавобини ҳам ўзи берсин!

Оқсоқол салмоқлаб гап бошлади:

— Тўғри, айбни акаларинг қилган. Биз аканинг айбини укага солмоқчи эмасмиз. Гуноҳкор қилгиллигини қилиб қочиб кетди. Энди уятдан юзи куйиб, бу яқин орада қорасини кўрсатмаса керак. Лекин бу жабрдийдаларга ҳам қийин. Қарасак, Ўроқбойнинг оғилида бир сигир ва бундайроқ ҳўкизчаси бор экан. Шу икки совлиқни мана буларга бериб юбортирайлик, десак, янгаларинг ёш болалари билан нима қилади? Сизлар ҳар ҳолда ўзларингга тўқсизлар. Хўп десаларинг, ҳар биринг биттадан мол берсанг, ўртадаги дилсийҳлик ўз-ўзидан барҳам топарди.

Икки уканинг капалаги учди:

— Бизларнинг ҳам бола-чақамиз бор, — деди иккаласи бараварига. — Ана, акамизнинг оғилидаги молларини олиб кетаверинглар, жон халос!

— Йўқ, соҳибсиз хонадондан мол олиб кетмайман, — деди Рўзбой қўл силтаб. — Лекин мен бир нарсанинг гувоҳи бўлдим: сен ака-укаларнинг бир-бирингга ҳамиятинг йўқ экан. Мен ўша молимдан кечдим, ҳайф сендай укаларга!

Рўзбой этагини қоқиб, ҳовлидан чиқиб кетди.

У уйига кириб келганда, укаси Ниёзбек бошчили-

гида пичоқланган молларнинг терисини шилиб, гўшти-ни нимталаб, қўшниларга тарқатиб бўлишибди.

Ҳамма чоп-чоп қилиб юрганда, у ёқда Шарофатни тўлғоқ тутди. Доя етиб келгунча унинг кўзи ёриди. Доя боланинг киндигини кесиб, ўраб-чирмаб онанинг қўлига берди. Хотини туғганидан беҳабар Ниёзбек уйига борди-ю, дояга рўбарў бўлди.

— Чироғим, отчопар қутли бўлсин, — деди доя Ниёзбекни муборакбод этиб (Форишликларда оилада ўғил туғилса «отчопар», қиз туғилса «отбойлар» дейишади). Ниёзбек ҳовлиқди:

— Холажон, хотинимнинг кўзи ёридими?

— Шундай чироғим, омон-эсон қутулиб олди, кириб кўр.

Ниёзбек апил-тапил ичкарига кирди. Доя кетма-кет исириқ тутатиб, кейин аталага унади. Онага аталани ичириб бўлгач, доя ўрнидан қўзғалди. Шарофат имлади, Ниёзбек олдиндан тайёрлаб қўйилган тугунчани токчадан олиб доянинг олдига қўйди. Доя дуога қўл очди.

Набирали бўлганидан хурсанд Жўрабобо қўй сўйди. Эртасига уйлари меҳмонга тўлди. Шу куни янги чақалоққа Жонон деб исм қўйдилар.

* * *

Жонон атак-чечак юрадиган бўлганда Жўрабобо билан Ҳожарбиби бу оламни тарк этишган эди. Жонон бирор марта оғрмай, инжиқ бўлмай ўсди. У кундан-кунга тўлишиб, кўзга яқин бўлиб бораверди. Бектошчи, еттига кирса-да инжиқлиги қолмас, йиғлоқи эди. Шарофат ирим қилиб, баъзида калиш билан йиғлоқининг оғзига уриб қўярди.

— Қизнинг йиғлоқилиги бахт, ўғилники ғам келтирар, — дея зорланарди она.

Ниёзбекнинг катта қизи Гулбека ўн бирга тўлганида озиб-тўзиб кетди. Унинг дардини ҳеч ким билмайди. У

кейинги кунларда еганини қайт қиладиган бўлди. Тоғ-ликлар кўпинча ўғилни эркалашади. Одат-податига қарамай, Ниёзбек шу қизини еру кўкка ишонмайди. Гулбекани кўрди дегунча, уни эркалатар, даст кўтариб пешанасидан ўпар, ширин сўзларини аямасди. Шунда Шарофат:

— Ҳай-ҳай, қизингиз кап-катта бўлиб қолди, эркалатгингиз келса, ана, ўғилларингизга боқинг, — деса-да, қизини суйишдан қўймасди. У ўғилларини-да камситмасди, уларни-да эркалаб, суярди. Лекин қизи бошқача-да. Баъзида унинг қайсидир хонадонга келин бўлиб тушишини ўйлаб, эзилиб кетарди ва Яратгандан унга соғлик, бахт тиларди.

Тақдир экан, «асраган кўзга чўп тушади» деганларидек, қизнинг ранги кун сайин синиқиб боряпти. Отанинг эса ичи ачийди. Айниқса, табиб қизнинг дардини ошкор қилгандан сўнг Ниёзбек тамоман қайғуга чўмди.

Ойнинг ўн беши қоронғу, ўн беши ёруғ, деганларидек, ёруғ, умидбахш кунлар ҳам келиб қолди. Бир куни узоқ қишлоқдаги Очилтош деган қариндошлари меҳмон бўлиб келди-ю, Гулбекани кўриб ажабланди. Кейин икки кун қолиб, қизни синчиклаб текширди. Очилтош кампирнинг Сафаротада «қўли енгил табиб хола» деган номи бор эди. У табиблик сирларини қайнатаси Бегмат отадан ўрганган.

Очилтош жияни Ниёзбекка:

— Гулбекани ўзим билан олиб кетай, зора бирор давоси топилса, — деб маслаҳат солди. Чиқмаган жондан умид, деб Ниёзбек билан Шарофат амманинг маслаҳатига рози бўлишди. Гулбекани кўрпага ўраб, аравага миндириб Сафаротага жўнатишди.

Ёз бўлишига қарамай тоғда ҳаво салқин. Очилтош қайнатасидан ўрганганларини ишга солди. Қайсидир бир гиёҳ гули Гулбеканинг касалига даво эканлигини биларди. У кўрадаги қўй-эчкиларни тоққа томон ҳайдади. Унга ўғли Акабой эргашди. Она-бола тоғнинг одам чиқиши гумон

жойига чиқишди. Очилтош кампир чарчаганда ўғли унга:

— Онажон, ўша гиёҳ қандайлигини менга айтинг, ўзим олиб тушаман, — деди.

— Эй, болам-ей, у гиёҳни топиш мушкул, ўзим чиқмасам бўлмайди, — деди она. — У гиёҳни кўрмаганимга ўн йилдан ошди. Яқин орада ундан фойдаланмаганман. Синглинг Гулбекага керак бўлиб қолди. Унинг касалига худди шу гиёҳ гули даво, буни раҳматли қайнатам айтган эдилар. У гиёҳ ўсадиган жойга фақат эчкилар чиқа олади ва топади. Шунинг учун эчкиларни бу ёққа хайдаб келдим-да, болам.

Қўй-эчкилар йўл бошлади, она-бола уларга эргашиб, кўзланган манзилга етдилар. Чўққида бир гиёҳ кўринди, эчки бўй чўзди, кампирнинг кўзи яшнади.

— Ана, мен айтган гиёҳ, эчкини хайда, еб қўймасин, — ҳайқирди кампир ўғлига қараб. — Қарагин, атиги бир нечта тупи бор экан. Гулининг чиройлигига қара, ўзиям нозиккина.

— Айтинг-чи, онажон, бу қандай касалга даво? — деб сўради Акабой.

— Силга даво, болам, силга. Баъзан қилтомоққа ҳам ярайди. Гулбека силга чалинган, — деди Очилтош кампир ҳансираб. — Бу гиёҳни фақат эчкилар топиб ейди. Шунинг учун эчкининг сути, гўшти фойдали ҳисобланади.

Гиёҳ юлинганда атрофга ажиб бир бўй таралдики, кишининг баҳри дилини очиб юборадир.

— Оҳ-оҳ, болам, бу ерларнинг ҳавоси ҳам дардга даво, — деди кампир ҳузурланиб. — Гиёҳнинг ҳидиничи! Ҳиди ҳам танларга даво.

Очилтош кампир гиёҳни юлиб, шу ернинг ўзида рўмоли устига ёйиб, қурита бошлади.

— Онажон, нега куёшга қаратиб қўйдингиз? — деб сўради ўғил. — Гиёҳни сояда қуритиш керак, дегандингиз-ку.

— Бунинг гули бошқача, ранги жозибали. Куёш қизгач, гули юмилади. Ҳар бир гиёҳ турлича қуритилади. Баъзиси сояда, баъзиси офтобда. Бу офтобни хуш кўради.

Офтоб нурида ҳам хосият кўп...

Гиёҳ бир оз қуригач, она-бола пастга тушишди. Салобатли тоғнинг кун тушадиган томони иссиқдан қовжиратган, кун тушмайдиган томон яшилликка бурканган. Тоққа чиқиш осон, тушиш қийин: сирғаниб кетиш ҳеч гап эмас.

Очилтош кампир тоғдан қайтганда, Гулбека ташқарида, ёнғоқ дарахти соясидаги ёғоч сўрида, юзига кўнган пашшаларни кўриб, мажолсиз ётарди.

— Болам, сўрини тут дарахти соясига олинглар, — деди кампир ўғли Акабойга қараб. — Тут дарахтининг тагидаги ҳаво енгилроқ бўлади.

Сўрининг жойи алмаштирилгач, кампир келинига эчки сутини алоҳида идишга солиб келишини буюрди-да, ўзи тоғдан олиб келинган гиёҳни бошқа бир гиёҳга қўшиб, дори тайёрлаш баробаринда бир пиёла қайнатилмаган эчки сутини Гулбекага ичирди. Сўнг кечқурун ўзи тайинлагандай, алоҳида кўрага қамалган эчки қийини ёқиб, чўғини олиб келтирди. Чўққа исириқ солиб, Гулбеканинг бошидан айлантирди, кейин кўйлагини кўтариб исириқ тутди. Тутун қизнинг баданига ёйилиб, ёқасидан чиқди. Шундан сўнг тайёрлаган дорисини қошиқлаб ичирди-да, қизни кўрпага ўради.

— Чирогим, энди бир оз ухла. Ичган малҳаминг, қий чўғи ва исириқ танангга сингсин, — деди кампир меҳрибонлик билан ва ўғлига, яқинда қўй сўйилганига қарамай, улоқча сўйишни буюрди. — Ўғлим, тоғда ўзинг кўрдинг, бу жонивор қанақа гиёҳларни ейишини. Шунинг учун унинг қийи, сути, гўшти ҳам фойдали. Янги сўйилган улоқ гўшtidан Гулбекага шўрва қилиб ичирамиз.

Хуллас, Очилтош кампир Гулбекани шу зайл қирқ кун мобайнида даволади. Қиз оёққа турди, иштаҳаси очилди, рангига ранг кирди. Ҳатто ҳовли супуришга ҳам тушди. Унинг бу ҳаракатини кўриб, Акабойнинг хотини:

— Ҳай-ҳай, супурманг, чарчаб қоласиз, — деб супургини унинг қўлидан олаётганида, Очилтош кампир:

— Қўявер, келин, қанча кўп ҳаракат қилса, танасида қон югуради, — деди.

Кунлар ўтиб, Гулбека тамоман соғайиб кетди...

* * *

Шу йили баҳор куруқ келди. Ўт-ўланлар қовжираб, нимжонлашди. Кишиларни ваҳима босди. Чунки ёғингарчилик бўлмаса, ўт-ўлан камайиб, чорва очликдан қирилиб кетиши мумкин. Натижада очарчилик бошланади.

«Кулфат келса, қўша келади», деганларидек, майсалар қовжираб, моллар қоқсуяк бўлди, ориқлари қирилди. Бир куни Ниёзбек далада қўшнининг келини ва қизини теша билан ер ковлаб юрганини кўрди. Улар юмронқозиқ уясини излашар, уни ковлаб бир ҳовуч-ярим ҳовуч дон топиб олишар ва уни егуликка ишлатишарди.

Дон ғамлаб қўймаган оилаларга қийин бўлди. Ниёзбек ҳамиятли эди, йиғиб қўйган донидан қўшниларига илинди. Баъзи кунлари катта қозон осиб, ёрма пишириб қишлоқдошларига тарқатарди.

— Сўйишга ярайдиган қўй бўлса, сўйинг, рўзғорда гўшт қолмади, — деди Шарофат эрига.

— Қўйлар озгин, сўйишга ярамайди. Лекин сенга бир нарсани кўрсатаман, — деб Ниёзбек аёлини томорқа адоғига бошлади ва кетмон олиб ер чопди. Шарофат ҳайрон, эри нимага ер ковлаяпти? Ярим қулоч ўра ковлангач, каттагина хум кўринди. Ниёзбек хумни ўрадан чиқарди. Унинг ичида нима борлигидан хотиннинг хабари йўқ, мўлмайиб қараб турибди. Эр хумнинг оғзини очди. Не кўз билан кўрсинки, хум тўла ёғ. Пича ёғ олингач, тагидан гўшт чиқди.

— Вой, қовурилган гўшт-ку, — севиниб кетди хотин, — қачон кўмган эдингиз? Бузилмабти-я!

— Эсингдами, — деди Ниёзбек хотинини қойил қолдириб, — ўтган йили қўрага бўри оралаб, бир неча қўйимизни ёриб ташлаганди. Шунда ярадор бўлганларини сўйиб, думбасига қовуриб бергандинг. Мен «бир кишига олиб бориб беришим керак бун», деб сенга айтган эдим. Лекин гапим ёлғон эди. Гўштни «муҳтожликда ярайди», деб шу ерга кўмиб қўйгандим. Бунақа

ишларни отам ўргатган эдилар...

Ниёзбек шу «топилма»ни ҳам қўни-қўшни, акаси билан баҳам кўрди. Кейинги йил серёмғир келиб, ҳосил баракали бўлди, рамақижон молларга жир битди.

Ниёзбек бадавлат бўлиши билан бирга саводли ва маърифатни хуш кўргувчи эди. Ўн икки ёшли ўғли Жононни Боғдондаги Алиқул тоғасиникига олиб борди. Тоғаси мадраса кўрган, саводли киши бўлиб, ўз уйида болаларга ўқиш-ёзишни ўргатарди. Тоға Жононни имтиҳон қилиб бўлгач:

— Хўш, нега катта ўғлингни олиб келмадинг? — деб сўради Ниёзбекдан.

— Каттасини ўқишга хоҳиши йўғроқ, — дея муж-малланди Ниёзбек...

Жонон зийрак бола эди. У тез фурсатда ўқиш-ёзишни ўрганиб олди. Сабоқдан кейин тоғанинг мол-ҳолига, рўзғорига қарашди. Бир куни тоғага қўшниси Бекқул ака нолиди:

— Алиқул тоға, олдинлари ерларимиз серҳосил эди, яхши ҳосил олардик. Негадир кейинги йиллар ернинг чўғи паст.

— Уруғлик чатоқдир-да, — деди тоға ўзича чамалаб.

Тоғасининг томорқасида ишлаётган Жонон ҳангомани эшитиб, худди кекса деҳқонлардай:

— Бекқул ака, мана бу мен ишлаётган ернинг тупроғи, — деди у ердан бир сиқим тупроқ олиб кафтида эзғиларкан, қўшнининг еридан ҳам бир сиқим тупроқ олди ва иккисини солиштирди. — Бу эса сизнинг томорқангизники. Аслида иккаласи ҳам бир хил тупроқ. Лекин бириси юмшоқ, қумоқ, сизнинг ерингизники тошдек қаттиқ.

— Ана, айтдим-ку, еримиз қаттиқ, — Бекқул Алиқул тоғага гап маъқуллади.

— Тупроқ бир хил, фақат юмшоғига гўнг солинган, қаттиғига солинмаган — ориқлаб кетган, — деди Жонон уларни ҳайратда қолдириб. — Қўй, қорамолларингиз кўп, ўшаларнинг гўнгини ерингизга солинг, ерин-

гиз яйрайди, ҳосилдор бўлади...

— Устоз,— деди бир куни Жонон сабоқ пайтида, — мен ёзишни эпламасам-да, ўқишни билсам бўлди. Отам билан акам рўзгор ишларида қийналиб қолишгандир. Бориб уларга қарашсам, дегандим, рухсат берасизми?

Бу зийрак бола мустақил ҳам савод чиқаришига кўзи етган устознинг кўнгли ийиб, Жононга рухсат берди. Устознинг айтганларига амал қилган Жонон ёзишни кўпроқ машқ қилди, мутолаага зўр берди. Алишер Навоий, Саъдий, Машраб каби алломаларнинг ашъорларини канда қилмай ўқиб, ёд олди ва билганларини ҳамқишлоқ тенгдошларига ҳам ўргатди...

* * *

Охирги пайтларда, қаричилик, Шарофат тез-тез оғриб қоладиган бўлди. Иштаҳаси ҳам бўғилган, сут ёки бир-икки қошиқ обу ёвғондан бошқасини татимайди. Ниёзбек унинг ҳолига қараб эзилади.

— Қизларни-ку эгасига топширдик, лекин келиндан дарак йўқ, — деди Шарофат эрига зорланиб. — Бу ўғилларингиз хонадор бўлишни ўйлашадими? Мен ҳам бундоқ чўзилиб, келиннинг қўлидан сув ичаманми? Бектош ўн тўққизни қоралаб йигирмага боряпти.

— Онаси, сен оёққа турган кунинг тўйни бошлаб юборамиз, — деди Ниёзбек хотинининг кўнглини жам қилиб. — Албатта келиннинг қўлидан чой ичасан...

Кишининг нияти яхши бўлсин экан. Баҳорга чиқиб Шарофат туриб кетди. Бундан шодланган Ниёзбек тўй тараддудига тушди.

Аслида келин бўлмиш қиз бор эди. Бектош қишлоқнинг адоғидаги қариндошиникига борганида, Лазокат деган кўшни қизга кўзи тушиб, унинг сарв қоматига, чаросдек кўзларига кўнгли суст кетган эди. Ҳатто бир-икки оғиз шакаргуфторлик ҳам қилишган. Шу-шу, қариндошни баҳона қилиб, қизни кўргани борадиган бўлди. Қариндошнинг қизи Ойбуви Лазокатга тенгдош.

Ойбуви қизни чақириб чиқди, Бектош у билан гап-лашди. Ана шу тахлит севги палак ёзди. Бунинг хабари ота-онанинг қулоғига ҳам етиб келди.

— Энди тўйни тезлаштирмасак бўлмас, — деди Ниёзбек хотинига маслаҳат солиб. — Келинликка Санжар аканинг қизи дуруст-у, лекин унга боришдан олдин ўғлингдан гап олсак.

Ниёзбек ўғли Бектошни ёнига чақирди.

— Ўғлим, Санжар аканинг қизига совчи қўймоқчимиз, — дея гапни узоқдан бошлади ота. — Кўриб турибсан, онангнинг соғлиғи яхши эмас. Келин олсак, ҳар қалай рўзгордан бўшаб, онанг бир оз ҳаловат топар, соғлиғи тикланар...

Бектош шошиб қолди, хаёлида шу бугун келин дегани уйга кириб келадигандай. Ўғлининг ҳаракатларини кузатиб ўтирган Ниёзбек:

— Нима дейсан? — дея ўғлидан гап сўради. Бектош жойида қўзғалиб қўйди ва паст овозда:

— Балки Шомурод аканикига борарсизлар, — деди-ю ташқарига чиқиб кетди.

Ниёзбек Шомуродни яхши биларди: дуруст одам.

— Демак, ўғлимиз Шомуроднинг қизига кўнгил қўйган, — деди Ниёзбек хотинига ўз хулосасини баён этиб. — Совчини ўшаникига юборамиз энди...

Шомурод совчиларни ноумид қилмади. «Қизимни бундан ортиғига бермасман», деб шарт розилигини берди. Орадан ҳафта — ўн кун ўтмасдан оқ рўмолга ўранган келинчак «ёр-ёр» садолари остида Ниёзбекнинг остонасини ҳатлади. Келинни кўриб, Шарофатнинг ҳам кўнгли кўтарилди, севинч ёшлари офтобда қорайган, ажин тушган юзларини ювди.

Лекин... лекин у «энди оёғимни чўзиб ётаман, хизматни келин қилади», деб ўйлаганлари бекор чиқди. Тоғ келинлари эрта туриб, сигир соғиб, нонушта тайёрлагувчи эди, лекин янги келин бу ишларни қайнамага қолдирди. Баъзида келин «ухлаб қолибман» деб

ўзини оқларди, қайнана «ҳали ёшсанлар» деб, келинни айбламасди.

— Келин олиб ҳам, қўлинг касов, сочинг супургими?! — хотинини жеркиди Ниёзбек. — Қўй энди, ишни келин қилсин!

— Қўяверинг, ҳали булар ёш, уйқуга тўйиб олишсин, — деб яна келинининг ёнини оларди Шарофат.

Бир куни Рўзибойнинг хотини Асалои овсини Шарофатга дийдиё қилди:

— Айтинг-чи, мендан нима ёмонлик кўрдингиз?

— Бу нима деганингиз, овсин? — ҳайрон бўлди Шарофат. — Сизни опам деганман-ку, сиздан ёмонлик кўрмаганман.

— Шундай экан, «шуни келин қиляапман», деб нега менга айтмагансиз?

— Шомуроднинг қизини келин қиляапмиз, деб айтганман-ку.

— Айтгансиз, лекин «Шомуроднинг қизи қанақа?» деб сўрамагансиз. Сўраганингизда, унинг қанақалигини айтардим.

— Вой, овсин, келиним шунчалар ёмонми? Ҳали ёш, ақли кириб қолар.

— Шунча пайтгача кирмаган ақл энди кирармиди! У уч ўғилдан кейин туғилган арзанда қиз эди: тантиқ, эркатой бўлиб ўсди. Меҳрсиз, бетгачопар қиз. Янгаларига озор бериб ҳузурланарди. Бир куни акаси Самарқанддан совға олиб келади. Ота-онаникини бериб, хотини ва синглисига олган совғани Лазокатнинг олдига қўяди.

— Синглим, сен совғалардан бирини танлаб ол, бири янгангга, — дейди ака. Сингил эса ҳар икки совғага эга чиқади. Онаси:

— Қизим, бирини ол, бири янгангга, — деса, Лазокат шойини олади-ю, сочпопукни ҳам бергиси келмай, онасига:

— Бўхчага солиб қўйинг, кейинчалик ўзим тақаман, — дейди. Қайнананинг қистови билан келин сочпопукни тақади. Эртаси куни янгасининг бошида соч-

попукни кўриб қутуради. Таёқ билан янганинг оёғига уради. Янга шўрлик ўтириб қолади. Шунда Лазокат жамалакка қўшиб янгасининг сочини ҳам ўткир пичоқ билан қирқиб олади. Акаси:

— Бу нима қилганинг! Нега янгангни сочини кесдинг? — деб дўқ урганда:

— Хотинига қул аканинг дастидан дод, — деб бақиради. Янга кетаманни олади. Ака хотинини зўрға оутади. Э, келинингизни бунақа қилиқларини айтаверса, тонг отади, овсин.

— Вой, овсин, мен бунақалигини илгари эшитмаган эканман, — деди Шарофат ёқа ушлаб.

— Қаердан ҳам эшитардингиз, овсин, уйдан бир қадам чиқмасангиз? — пичинг қилди Асалоӣ.

— Рўзғордан ортиб қаерга ҳам чиқардим, — оғринди Шарофат. — Келин қилиб ҳам қўлим бўшамади-да...

Қайнана келини ҳақидаги ҳақиқатни билгач, унга нисбатан бир оз қаттиққўллик қилишга жазм этди.

— Келин, энди сен ҳам бир оз рўзғорга қайиш, — деди Шарофат эртаси куни. — Эртароқ туриб, сигир соғ, ҳовлини саранжомла! Мен ҳам қайнана бўлиб, сенларнинг роҳатингларни кўрай-да бундоқ.

Лазокат қайнананинг муомаласидан ҳайрон қолди. Чунки шу хонадонга келин бўлиб келганига бир йилдан ошибдики, қайнанадан бу оҳангдаги гапни эшитмаган эди. Лекин барибир чўрткесарлигига борди.

— Сигир соғишни билмайман, — деди қошларини чимириб. — Сигирнинг сассиғи ёмон.

— Сутини ичгандан кейин, сассиғига ҳам чида-да, келин. Шунча ҳурматингни қилдим, ёш дедим, ақли кирар дедим, чидадим. Қарасам, ўзингдан билиб ҳеч ишга бош қўшмайсан. Қачонгача менга юкунасан. Бугун бор бўлсам, эртага... Етар энди, рўзғорни қўлга ол!

— Ношукр бўлманг, ойижон, — тумшуғини бурди Лазокат, — супир-сидир, қозон-товоқ ювиш, кир-чир деганларидай — булар иш эмасми?

— Жонингни гамини қилмай қўяқол! Ҳалигача тоғорага ўтирганингни кўрганам йўқ. Тандирга-ку, юзим куяди дея яқинлашмайсан. Ўзингни онанг бирор марта келинларини тахтиравонда ўтирғизиб, ўзи улар кўз ўнгида елиб-югурганми?

Лазокат энди маломатга ўтди:

— Биламан, сиз бошидан мени ёмон кўргансиз, — деди лабини чўчайтириб. — Бектош акамга бошқа қизни олиб бермоқчи бўлгансиз, лекин ўғлингиз мени дегандан кейин ноилож кўнгансиз. Энди шунинг аламини мендан оляпсиз...

Қайнана гапни мухтасар этса-да, келиннинг дийдиёси кечкурун ҳам давом этди. Лазокат қайнана билан бўлган машмашани эрига ошириб-тошириб айтди:

— Онангиз мени хушламайдилар, — эрига эркаланди у. — Қилгам ишимдан доимо бир камчилик топадилар. Ўлар бўлсам, ўлиб бўлдим. Нима, менга, ўлдириш учун уйланган эдингизми? Рўзгорнинг бутун ташвиши менинг бўйнимда, рўзгордан ортиб онамникига ҳам бориб-ке-лолмайман. Жаллод онангиз рухсат бермайдилар.

— Унчалик эмасдир-ов, Лазокат, — ишонқирамай қаради хотинига Бектош. — Бирор марта онамнинг сенга қаттиқ гапирганларини кўрмаганман, оғизларидан «ке-линжон» тушмайди-ку.

— Сизнинг олдингизда шундай, сиз чиқиб кетдингиз — ҳаммаси бошланади. Жон-жон деб жонимни оладилар.

— Хўш, бу билан нима демоқчисан?

— Рўзгоримизни ажратиб берсинлар.

— Одамлар нима дейди? Бир йил бўлмай рўзгорини бўлак қилибди. Бу қанақа келин экан, дарров қайнана-си кўнглига урибди-да, дейишмайдими?

— Дейишса дейишаверишсин, менга барибир! Мен бу уйда ортиқ туролмайман!

Бектош хотинининг гапларини чақиб кўрса, наздида унинг айтганларида жон бордай. Эрталабки нонуштани хотини тайёрласа, дастурхонни йиғиштира, ҳов-

лини супурса ва ҳоказо, ва ҳоказо. Онасига яна нима керак? Битта келин шунчалик бўлар-да.

Бектош хотинининг сочини силади:

— Қўявер, қаричилик, унинг устига мазалари йўқ, гапираверадилар-да. Сен гапларига парво қилма, «хўп» де, билганингни қилиб юравер. Сен аввало мени де, қолгани суришиб кетаверади.

— Шунақа дейсиз-у, эртага онангиз мендан шикоят қилиб қолсалар, дарров у киши томонга оғиб кетасиз-да!

— Ундай бўлмайди. Биринчидан, онам шикоятчи эмас, у кишидан хафа бўлмасанг ҳам бўлади, иккинчидан, шунақа бўладиган тақдирда, кўнглинг тўқ бўлсин, мен ҳамisha сен томондаман, жоним.

— Чинингизми?..

Шу зайл Лазокат қичишадиган жойини олдиндан қашиб қўйди.

Орадан икки ой ўтди. Шарофатнинг дарди зўрайди, кўрпачага михланиб қолди. У бундай бўлишини кутмаган эди, лекин начора, иссиқ жоннинг иситмаси бор экан, тақдирга тан бериб, хона шифтига тикилиб ётибди. Қайнананинг бу ётиши келинга ёқмайди. Чунки рўзгорнинг бутун ташвиши унинг бўйнида-да. Шу пайтгача оғирнинг остидан, енгилнинг устидан юриб ўрганган кишига бирдан оғирлик тушса, малол келади-да. У «қайнанам атайин ўзини касалга солиб ётибди», деб ўйлайди. Шарофат унинг шундай деб ўйлашини билади. Бир-икки жеркиганида келинининг ичидагини уқиб олган. Лазокат қайнанасидан азбаройи ўлган кунидан ҳолаҳвол сўрайди, у ҳам тил учиди.

Шарофат қўшни кампирнинг бетоблигини эшитди-ю, ичи ачишди. Ўзи касал бўлгани учун ундан хабар ололма-япти. Шу боис Лазокатни чақириб, қўшнидан хабар олишни сўраган эди, Лазокат сасиб берди:

— Ўзимнинг касал боққаним етмагандай, энди қўшни-ники бормиди? Касали юқумли, ижирғанаман, — деб қайнананинг гапини рад этди Лазокат.

Пешанангга не кўргиликлар ёзилган экан? Ҳеч бўлмаганда бошингда отанг тирик бўлганда эди, гўримда тинч ётардим», деган гаплар ўтди кўнглидан Шарофатнинг.

Лазокат ноиложликдан ҳовлидаги юмушларни қила бошлади. Шарофатнинг ташвиши — Жононни уйлантириш бўлиб қолди. У анчадан бери синглиси Мадинанинг қизи Руқияни кўз остига олиб қўйганди. Қиз сулуvgина, қадди-қомати келишган, оёғи чаққон эди. Шу уйда бўладиган катта-кичик маъракаларда елиб-югуриб хизмат қиларди. Унинг ҳаракатлари, қирқ ўрим сумбул сочиға қараб Шарофатнинг ҳаваси келарди ва «ўлмасам, шугинани келин қиламан», дегувчи эди. Лазокат бўлса, қайнанасининг фикру хаёлига ижирғаниш билан қарарди:

— Ҳайронман, қайнаман бу яланг оёқларни бунча ўзига яқин олади? Кунини зўрға кўраётган шармандалар наҳотки бизнинг тенгимиз бўлса?

Шарофат кўнглидан ўтганларни эрига ҳам айтган эди. Шунда Ниёзбек:

— Сен нима десанг шу, — деган. — Лекин ўғлинга ҳам бу ҳақда бир оғиз айтиб қўйиш керак.

Эрининг маслаҳати билан Шарофат ўғли Жононга гап очди:

— Ўғлим, кўзимнинг очиқлигида сени хонадор қилсам дегандим. Хўп десанг, холангни қизи Руқияни сенга олиб берсак, нима дейсан?

Жонон уялибгина ерга қаради.

— Сиз шуни маъқул кўрган экансиз, нима ҳам дердим, — деди Жонон ва мушукдек сирғалиб хонадан чиқиб кетди. Ўғлининг жавобидан Шарофатнинг кўнгли тоғдек кўтарилди ва бу хушхабарни эрига етказди. Лекин шу кунларда Ниёзбекнинг кўзлари чўккан, бетоб эди.

— Сал ўзимга келай, онаси, кейин унаштириб қўямиз, — деди Ниёзбек ва келини Лазокат билан ўғли Бектошни чақириб, бу хабарни етказди: — Шундай, соғайиб кетсам ўзим бош бўламан. Мабодо, худо кўрсатмасин, бирор кор-ҳол бўлса, икковинг бош бўлиб, Ҳаким поччангни қизи Руқияни Жононга олиб берасанлар.

— Қўйинг-е, аввало совуқ нафас қилманг, кейин ўша чўпон бизнинг тенгимиз эмас, — деди Лазокат лабини буриб. — Жононга не-не қизлар тегмайди дейсиз.

— Бу гапингни қўй, келин, — деди Шарофат. — Чўпон бўлса ҳам Ҳакимжон диёнатли одам. Диёнатли одамнинг фарзанди ёмон бўлмайди. Руқиянинг ўзи ҳам одобли, кўркемгина қиз. Битта оилани обод қилади. Бу менинг истагим, тамом!.. Бектош, болам, сен Мадина холанг билан Руқияни бу ерга олдир, уларга ҳам айтиб қўяй...

Она-бола кўз ёш билан кириб келди:

— Опажон, — деди Мадина кўз ёшини енги билан артиб, — ётиб қолганингизни эшитмабмиз. Илгари бетоб бўлганингизда Руқия ёнингизда эди. Нега бу сафар айтдирмадингиз ё Руқиянинг хизматидан кўнглингиз тўлмадими?

— Нега, синглим, сизлардан икки дунё розиман, — деди Шарофат ва Руқияга чой дамлаб келишни буюрди. Опа-сингил ёлғиз қолишгач, Шарофат: — Мадина, сен жигаримсан, — деб муддаога кўчди. — Руқияни бировга ваъдалашмаганмисан?

— Йўқ, нима эди? — ажабланди Мадина.

— Кўнглингни билайин деб эдим. Руқияни ўзим келин қилмоқчиман, нима дейсан?

— Нима дердим, ниятингизга етинг, опажон. Лекин хўжайиним, қайниларим бор, уларнинг олдидан ўтиб қўйсаларингиз яхши бўларди.

— Ҳа, албатта, бусиз иш битмайди. Совчилик эркакларнинг иши. Мен сенинг кўнглингни билмоқчи эдим, холос.

Бу пайтда Руқия чой дамлаб келди, Лазокат дастурхон ёзди. Руқия чойнакни қўйиб, чиқиб кетмоқчи эди, Шарофатнинг ишораси билан Руқия онасининг ёнбошига ўтирди. Шарофат боши билан устига кўрпача терилган сандиқни кўрсатди.

— Руқияжон, қизим, ана у сандиқни очиб, кўк рўмолчали тугунни менга олиб бер!

Руқия холасининг айтганини бажарди. Шарофат ту-

гунчани очиб, тилла сирға билан тилла узук олди-да, синглисига узатди.

— Мана бун қизингга тақиб қўй. Булар унга аталган.

Руқия дув қизариб:

— Вой, ўлай, — деди юзини қўллари билан яшириб. Бу ҳолни кўриб Лазокатнинг ранги бўзарди ва Руқияга қараб:

— Ҳа, тиллани нимага тақаяпсиз? — деди кўзлари олайиб. — Шу уйнинг келини бўлиб, мен тақмаган тил-лалар. — Кейин қайнанасига қараб: — Шу яланг оёқлар мендан азиз бўлдим сизга? — деди.

— Келинжон, яланг оёқ бўлиб, сендан оёқ кийим сўраб келганимиз йўқ, — деди Мадина оғриниб.

— Сен, сассиқ гапингни қўй, — деди келинининг гапини кесиб Шарофат. — Қизини келин қиламан, деб айтган эдим-ку, эсингдан чиқдимми?!

Лазокат бир зум жаҳл билан қараб турди-да, сўнг шарт бурилиб, хонадан чиқиб кетди.

— Гапига парво қилма, унинг жиззакилигини биласан-ку, — синглисининг кўнглини кўтарди Шарофат. — Гапи-ради, гапиради, охири пилдирпис бўлиб қолади. Менинг гапим гап, Руқияни келин қиламан, дедимми, тамом!..

Афсус, Шарофат ниятига етолмади, шу воқеадан ҳафта — ўн кун ўтиб, бандаликни бажо келтирди. Жон-нон эсанкираб қолди. Яқинда отасидан, энди онасидан айрилиб, бўзлаб йиғлади. Қийин-қийин, унга қийин бўлди. Тез кунда озиб-тўзиб кетди. Бектош унга қараб юраги ачишар, тасалли беришга эса оқсарди.

Онанинг «йил»и ўтиб, Лазокатга тил битди.

— Онангизни ҳам қабри совиди, — деди эрига масла-ҳат солиб. — Энди бир яхши қиз топиб, етимчанинг бо-шини икки қилайлик. Шу баҳона дардлари арирмиди.

— Ҳа-я, тўғри айтасан, ота-онамизнинг васиятини адо этиб қўйсақ, елкамиздаги қарздан қутулган бўлар-дик, — деди Бектош. — Руқияни келин қиламиз-да энди. Онам шуни васият қилиб кетган эдилар.

— Э, қўйинг ўша Руқиянгни, бошқа қиз қуриб қолибдимми! — эрини жеркиб берди Лазокат.

— Ундай бўлса, укамдан сўрайлик-чи, у нима дей-

ди, — хотинига қарши боролмади Бектош.

Жононни ўртага олишганда, у бошини ҳам қилиб тураверди. Лазокат гапни узоқдан бошлади:

— Жонон, сизга гулдек бир қиз топдик, яқинда унаштирмоқчимиз, — деди ва эрига маъноли қараб қўйди.

— Қиз топдик, деганингиз нимаси, янга? — деди Жонон бошини кўтариб. — Қиз тайёр-ку.

— Қайси қизни айтяпсиз, Жонон?

— Холамнинг қизи Руқияни-да. Онам «уйлансанг фақат шунга уйланасан», деган эдилар-ку.

— Қўйинг ўша таъвияни, мен сизга бошқасини топиб бераман.

— Хотин, қўй бошқасини, Жононнинг айтганини қилайлик, — писибгина гапирди Бектош.

Лазокат ёниб кетди.

— Нима, сиз молбоқар билан қуда бўлмоқчимисиз?! Наҳотки ўша исқиртларга ўзингизни тенглаштирсангиз!

— Сен ҳақорат қилма. Бир ҳисобда улар қариндошимиз, холам бўладилар-а. Ундан кейин ўртада «васият» бор, лафз бор. Уларнинг ҳам бундан хабари бор. Камбагаллик айб эмас, лафздан қайтиш айб.

— Мени, айб-пайбингиз билан ишим йўқ! Ўша қизни бу хонадонга келин бўлиб келишига қаршиман, — деди Лазокат елка томири тортишиб. — Ўзимни кўзлаганим бор, тамом!

— Э, билганингни қил, — деди Бектош қўл силтаб, сўнг қўлидаги пиёлани дастурхонга тақ этиб қўйди-да, ўрнидан туриб кетди. Эр-хотиннинг жанжалидан энсаси қотган Жонон ҳам акасига эргашди.

* * *

Жонон бўзбола бўлиб етишди. Тоғликлар азалдан кураш тушишнинг, чавандозликнинг ҳадисини олган халқ бўлади. Жонон ҳам салафларига муносиб бўлиб, курашу чавандозликни пухта эгаллади. Тенгқурлари ичида тенги йўқ паҳлавон бўлди, «баҳодир» номини олди.

Бир куни далада қаровсиз қолган қишлоқ моллари-

ни аллақандай ўғрилар ҳайдаб кетишибди. Ҳамма ҳайрон, нима қилишларини, қаёққа чопишларини билишмайди, бошлари қотган. Шунда уларга Жонон ёрдамга келди ва икки қулочли сўйилини елкасига ташлаб, ўғриларнинг пайига тушди.

Жонон сўйилни бобосидан эшитган усулда ясаган: зарангдан йўниб олган таёқни мойлаб, уч ой давомида офтобда тоблади, таёқ мойни ўзига сўриб олгач, уни яна мойлаб, энди сояда қуритди ва яна мойлаб боз офтобда тоблади. Шундан сўйил деган жонивор темирга айланди-қолди.

Айтишларича, ўғрилар молларни ҳайдаб кетишганига унча бўлган эмас экан. Жонон тоғни қиялатиб, айланма йўлидан ўғрилар орқасидан от солди. Бу йўлдан фақат яёв юрса бўларди. Жонон отини худди шунақа йўллардан юришга ўргатганди. Ақлли жонивор ингичка йўлдан елдай учди. Жонон чамалади. Уларнинг орқасидан тўғри йўлдан қувса етолмайди. Бир соатлар чамаси тор йўлдан ўтиб, ўғриларга етиб қолди.

Рустам келбатли йигитнинг от чоптириб келаётганини кўрган уч нафар ўғридан иккитаси унга қарши чикди, биттаси ўғрилик молларни ҳайдаб кетаверди. Икки ўғрининг қўлида ҳам сўйил бор эди. Жонон ҳам сўйилни ўйнатиб уларга қарши юрди ва сўйилни шундай чаққонлик билан айлантирдики, у бориб тегиши билан ўғриларнинг сўйили синиб, қўлларидан учиб кетди. Кейинги зарбда ўзлари ҳам ерга қулашди. Уларнинг бирини боши харсанга тегиб, жон талвасасида питирлаб қолди. Жонон иккинчи ўғрига хужум уюштирмай:

— Шеригинга ёрдам бер! — деди. Бу ҳолни кутмаган ўғри йигит шеригини қўлтиқлаб, чаккасидаги ярани боғлади. Молларни ҳайдаб кетаётган учинчи ўғри «балодан нари» деб орқасига қарамай қочди. Икки ўғри ўзига келгач, Жононнинг мардлигига тан бериб, унинг қаршисида тиз чўкишди.

— Эй, йигит, биз ўлимдан қўрқиб эмас, сенинг мардлигинга тан бердик, — деди улардан бири.

— Қаерликсизлар, нега бировларнинг молини ҳай-

даб кетаяпсизлар? — деб сўради Жонон.

— Биз ана шу тоғ орқасида яшаймиз. Қишлоғимиз-гача бу ердан ярим кунлик йўл. Биз бир умр шу касб билан умргузаронлик қилиб келдик. Биз олти киши эдик, бурноғи йили учтамызни бир қишлоқ аҳли тутиб, ўлдирди. Сен эса бизларни ўлдириш ўрнига, омонлик бердинг. Бунинг сабаби не? Сендек ботира ўғлонни ким деб атайдилар?

— Мени эл «Жонон баҳодир» деб атайди, — деди Жонон ўзини таништириб. — Сенларга омонлик берганимнинг маъниси, одам адашади, унга тўғри йўлни кўрсатсанг, хотосини тушуниб, ҳақ йўлига кириши мумкин. Мен ҳам сизларга, «тавба қилинлар, ҳалол яшанлар», демоқчиман. Ҳалол топилган луқма ҳаминча ширин ва беминнат бўлади.

— Эй, баҳодир ўғлон, — дейишди икки ўғри, — сен биздан ёш бўлсанг-да, кўзимизни очдинг. Энди бу касбни ташлаб, ҳақ йўлига киргаймиз. Худо сендан рози бўлсин! Ана, молларинг, уларни олиб кет. Бизнинг қишлоққа йўлинг тушса, азиз меҳмонимиз бўл, сени ҳалол топган луқмамиз билан сийлагаймиз.

Жонон ўғирланган молларни қайтариб келганини кўриб, халқ унга офаринлар ўқиди ва бу ишни қандай эплаганини сўрашди. Жонон мақтанчоқлик қилмади.

— Ўғрилар мени узоқдан кўриб, ўзлари молларни ташлаб қочишди, мен молларни бу ёққа ҳайдаб келардим, — деди камтарлик билан...

Бир йил қиш қаттиқ келиб, кўп моллар қирилди. Қарангки, шу йили мол ва дон ўғриси кўпайди. Бектошнинг ертўласида дон борлигини кўпчилик биларди. Шу кечаси қишлоқда тўй бўлаётган эди. Қишлоқ аҳли — хотин-эркак — бари шодиёна бўлаётган хонадон меҳмони эди. Эркалар базмда, аёллар «ёр-ёр» билан овора. Тўй кечаси Жононнинг кўнгли бир нимани сезди ва дўсти Наврўзбойни қаватига олиб, уйларида хабар олгани борди. Не кўз билан кўришсинки, ҳовлида икки кўланка, улар қопланган нарсаларни аравага ортишаётибди. Жо-

нон уларни ўғри эканликларини билди ва тезда ишга киришди. Пайт пойлаб ҳар икки ўғрини тутиб, қўлоғини боғлади. Лекин уларга қўл теккизмади.

— Сенларни эрталаб қишлоқ аҳлининг ўзи жазоласин, — деди Жонон. Икки ўғри эса ялинишга тушди:

— Шарманда қилма бизни, тавба қилдик!

Кейинги пайтларда дон ва мол ўғрилари кўпайиб кетган эмасми, ҳар кuni кимнингдир уйидан нимадир йўқоларди. Айниқса, яқинда бева аёлнинг икки қоп ғалласини олиб, икки норасида гўдаги олдида уни бадном қилиб кетганларидан сўнг, аёл номусига чидай олмай, ўзини осиб қўйган эди. Бу қишлоқ аҳлини қаттиқ ғазаблантирган эди. Жонон уларга шу воқеани эслатганида, ҳар иккаласи бу ишни қилмаганликларини айтишди.

Эрталаб ўша марҳум аёлнинг икки ўғлини олиб келиб, ўғриларга рўбарў қилишди. Болалар «булар эмас», деганларидан сўнг, қишлоқ оқсоқоли тандирга иссиқ нон ёптириб, ўғриларга едирди, сўнг устидан муздек тарвуз кесиб берди. Ўғрилар тарвузни еб бўлишгач:

— Ана энди отларингга мининглар-да, келган жойларингга кетинглар! — деб ўғриларга жавоб берди. Бу ҳолдан атрофдагилар ҳайрон эдилар.

— Оқсоқол, уларга жазо бериш ўрнига, қоринларини тўйдириб юбордингиз-ку. Буни нима деб тушунмоқ керак? — деб оқсоқолга юзланишди. Оқсоқол бир оз тин олгач, шундай деди:

— Мен уларга энг оғир жазони бердим. Иссиқ нон билан муздек тарвузни ейишди. Уйларига етиб боргач, уч кундан кейин оғизларидаги барча тишлари тўкилади. Бу улар учун олий жазо бўлади. Енгилроқ жазо берсак ҳам бўларди-ю, лекин етим болалар «ҳамқишлоқларим ўғриларга шафқат қилишди», деб биздан домангир бўлишарди.

Шундан кейин Сафарота ва Боломонота қишлоғига бошқа ўғри ораламади.

* * *

Ховлига якка хўжайин бўлиб олган Лазокат ҳаддидан ошди. Бектош кўпкари-ю, тўй, зиёфатлардан бери

келмади. Рўзгор ишлари, экин-тикинга қараш Жонон зиммасига тушди. Латофат қайниси Жононга Руқияни олиб беришларига қарши чиққанига сабаб бор эди. Чунки у ўз синглиси Ойгулни келин қилиш тарафдори эди. Бу мақсадини эрига айтганида, Бектош:

— Жононнинг ўзи нима дейди? — деб сўради.

— Нима дерди, сизнинг айтганингизга кўнади-да, бошқа чораси ҳам йўқ. Руқия ҳам ўз тенгини топиб кетар.

— Қани, бир оз шошма, ўйлашиб кўрайлик, — деди Бектош гапни орқага суриб...

Руқияга совчилар кела бошлагач, онани хавотир босди. Ўртада опасининг васияти бор ахир. Унинг устига Бектошникидан совчи келмаяпти. Айнишдимикан? Мадина эри билан маслаҳатлашиб, Бектошникига ўзи борадиган бўлди. Лазокат уни менсимай кутиб олди. Ошу овқатдан кейин Мадина ташрифи боисини айтганда, Лазокат:

— Жононга бошқа қизни олиб бермоқчимиз, — деди томдан тараша тушгандек.

— Опамнинг васияти-чи?

— Опангиз васият қилган бўлсалар қилгандирлар, лекин қизингизга йигитнинг кўнгли бўлмаса, бизлар нима қилайлик?

Мадина устидан бир челақ совуқ сув тўкилгандек, ҳафсаласи пир бўлиб, бу хонадондан чиқиб кетди.

Бу орада Жонон Руқия билан бир неча бор учрашди. Ҳатто қизга онасининг васиятини ҳам эслатган. Шунда Руқия уялиб, юзларини яширган. Бир куни Жонон Руқияни далада кўриб қолди. Қиз дам ерга ётиб олар, дам ўрнидан турарди. «Нега ундай қилаяпти», деб Жонон қиз томонга юрди ва қараса, қиз боқиб юрган қўйлардан бири қўзилабди ва қўзичоқ ўрага тушиб, қиз уни чиқаролмай овора экан. Жонон етиб келиб, унга ёрдам бермоқчи бўлди.

— Жонон ака, мен туша қолай, сиз мени тортиб оласиз, сиз тушсангиз, мен сизни тортиб ололмайман, — деди Руқия ва йигитнинг жавобини кутмай ўзи ўрага тушиб, қўзичоқ-

ни унга узатди. Йигит кўзичоқни ерга қўйиб, қизнинг қўлидан тортиб оларкан, ноҳос қиз унинг қучоғида пайдо бўлиб қолди. Биринчи марта ўзини йигит қучоғида кўрган қизнинг кўзи тиниб, боши айланди. Жононнинг ҳолати ҳам шунга яқин. У Руқияни қучоғидан бўшатмай турди-да, кейин қизнинг қаршилигини сезиб, қўйиб юборди.

— Жонон ака, уялмайсизми? — деди Руқия юзлари оловдай ёниб.

— Руқия, эртага ҳам шу ерга кел, — деди Жонон ялинган оҳангда. — Сени кўрсам хурсанд бўламан.

— Уятсиз, — деди Руқия ноз билан ва тезда кўздан ғойиб бўлди. Руқия эртаси куни келмоқчи эмас эди, лекин қандайдир куч уни шу томонга етаклади. Иккаласи бир-бирини сўзсиз тушунгандай, харсанг устида узоқ ўтиришди. Жонон яна қизни бағрига босмоқчи бўлди, лекин қиз бунга изн бермади.

— Жонон ака, сиз ёмонсиз, — деди Руқия эркалиниб.

— Яна бир марта «ёмонсиз» дегин, — дея зорланди Жонон. — Бу гапинг қулоғимга мойдек ёқяпти.

— Ёқмайла кетсин. Тўғри ўтиринг, бўлмаса эртага келмай кўяман.

— Ундай қилсанг, ўлиб қоламан, Руқия. Мен сенинг рухсорингни бир кун кўрмасам, адо бўламан ахир.

Руқия шунчалар барно, жозибали эдики, уни тасвирлашга сўз қаҳат. «Қиз дегани ҳам шунчалар гўзал бўладими?» деб Жонон унга боқиб тўймасди.

— Жонон ака, энди кетайлик, бегонанинг кўзи тушса, уят бўлади, — деди Руқия.

— Руқия, мен сени яхши кўраман.

— Биладан, — ерга қаради Руқия.

— Айт-чи, сен ҳам мени яхши кўрасанми?

Руқия жим қолди.

— Уялма, фақат тўғриси айт.

— Буни айтолмайман-ку.

— Лекин кўзларинг бу гапни айтяпти, Руқия.

— Кўзлар «сотқин» бўлади ўзи.

— Ҳадемай тўйимиз бўлади. Сен меники бўласан, —

энтикиб айтди бу гапни Жонон.

— ...

— Нега жимсан, бир нима десанг-чи, Руқия.

— Кеча туш кўрдим, негадир бу тушдан кўнглим гаш, — деди Руқия маъюс тортиб.

— Қанақа туш экан, айт-чи.

— Иккаламиз қўл ушлашиб турган эканмиз. Сиз мени ўзингизга тортмоқчи бўлганингизда бирдан қоронғулик пайдо бўлиб қолибди. Ўртамизда жарлик бор эмиш. Сиз қўлимдан ушламоқчи бўлиб интиларкансиз. Лекин жарлик кенгайиб боравераркан. Сиз ёруғлик томонда, мен эса қоронғуликда қолибман. Жарлик устида кўз илғамас қилкўприк бор эмиш. Қачон шу кўприкдан ўтсак, бир-биримизга етишарканмиз. Бора-бора, кўринмай қолдингиз... Уйғониб кетсам, тушим экан.

— Қизларнинг туши тескари келади, — деди Жонон кулиб. — Демак, бир-биримизга етишар эканмиз...

Иккиси икки томонга ажрашишди. Жонон шу сафар Руқияни охири марта кўраётгандек, орқасига қарай-қарай кетди.

Руқия оиланинг яккаю ягона арзанда қизи. Ҳаким билан Мадина турмуш қуришиб, ўн беш йил деганда шу қизга етишишди. Кўрсатмаган бахши-ю, табиблари қолмади. Охири Боломон ота зиёратига бориб, фарзанд сўрашди. Эртаси куни Мадина туш кўрди. Тушида оппоқ соқолли чол: «Қизим, қўлингни мана шу тош устига қўйиб, чин дилдан илтижо қил», дебди. Шунда Мадина кафтини тепага қаратиб тошнинг устига қўйибди-да, йиғлаб-ёлвориб фарзанд тилабди. Чол эса: «Эй, қизим, сен ноумид бўлма, сен фарзандли бўласан. Қўлингни тошга чалқанча қўйдинг, сен қиз кўрасан. Агар юзтубан қўйганингда ўғилли бўлардинг», дебди.

Шу тушдан бир йил ўтиб, Руқия туғилган экан.

Лазокатнинг гапидан кейин Мадина биринчи келган совчиларга розилик бериб юборди. Бу савдони Руқия дугонаси орқали Жононга етказди. Жононнинг бошидан ҳуши учиб, Мадина холасиникига учиб борди. Хо-

ласи йиғлаб-сиқтаб, Лазокатнинг гапини айтди.

— Мен... биз... бир-биримизни яхши кўрамиз, — деди Жонон ёлвориб. — Бизни айирманглар! Янгам айтаверадилар, мен эса Руқиясиз яшолмайман!

— Энди кеч, Жонон, — деди холаси пастки лабини тишлаб. — Руқияни унаштириб қўйдик, фотиҳани бузолмаймиз. Сенинг бахтинг ҳали олдинда. Бахтингни Аллоҳим берсин! Энди кет, чироғим.

Жонон тушкун кайфиятда уйга қайтиб келди.

— Ҳа, нима бўлди, қовоғингдан қор ёғади? — деб сўради акаси. Жонон акасининг қаршисида тиз чўкди.

— Акажон, онамнинг васиятини унутдингизми?

— Нега ундай дейсан? Унутганим йўқ. Хўп десанг, эртагаёқ одам қўйдираман. Бунинг хафа бўладиган жойи йўқ.

Ишнинг бу тарзда чаппа кетишини кўрган Лазокат:

— Мен... мен... — деганича чулдираб қолди.

— Ҳа, нима сен? — хотинига юзланди Бектош.

— Мен холангизга «қизингизни келин қилмаймиз, Жонон бошқага кўнгил берган», деб юборгандим.

— Нега мендан бемаслаҳат иш қилдинг, кўрнамак? Ким сенга рухсат берди ўзбошимчалик қилишга? — хотинига мушт дўллайтирди Бектош.

— Мен «улар тенгимиз эмас», деганимда индамаган эдингиз, шунга... — маккоралик қилди Лазокат.

— Мен Руқияни келин қилмаймиз, деб айтмаган эдим-ку!

— Мен, Руқияга уйланмасам, дунёдан тоқ ўтаман! — қатъий жавобини айтди Жонон.

— Укажоним, бу гапни айтма! Ҳаммасига мен айбдорман, сени ўйламабман! Кўзимга ҳали ёш кўринибсан. Бундан «манави ифлос фойдаланибди», деди Бектош ва қўлига илинган човгумни хотинига қарата отиб юборди. Човгум Лазокатнинг елкасига тегди ва у тиззалади. Унинг дод-войига қарамай, Бектош холасиникига қараб чопди. Холаси уни ҳеч гап бўлмагандай кутиб олди.

— Кел, чироғим, эсон-омон юрибсанми?

— Хола, нега ундай қилдингиз?

— Мен эмас, ҳамма ишни хотининг қилди. У бизни писанд қилмади. Опам тириклигида ҳам шундай қилган эди: тенгимиз эмассан, яланг оёқсан, деганди. Опамнинг юзи деб кечиргандим. Жононнинг Руқияга кўнгли борлигини ҳам билардим. Совчилар келавергач, сендан садо чиқмагач, юзимни шилиб, уйингга бордим. «Жонон қизингни хушламайди, бор, қизингни кимга берсанг бер», деб хотининг мени оёқости қилди. Опамнинг васиятини эслатсам-да, барига тупурди. Шундан кейин нима қилишимиз керак эди?

— Нега менга учрашмадингиз?

— Сен нима қилолардинг? Ўшанинг измидасан-ку!

— Энди нима қиламиз?

— Энди фотиҳани бузолмаймиз. Жононнинг бахтини Аллоҳнинг ўзи берсин! Сенга бошқа айтадиган гапим йўқ...

Бектош дарду дунёси қоронғу бир ҳолатда холасининг уйидан чиқиб кетди. Жононга нима дейди энди?

То ҳануз фарзанд кўрмаган Лазокатнинг мақсади — сингисини келин қилиб, бу уйга маҳкамроқ ўрнашмоқчи, меҳнаткаш Жононни ўзлариники қилиб олмоқчи эди. Ўша кунги можародан кейин у аразлаб кетмоқчи эди, лекин оқибати ёмон бўлишини ўйлаб, фикридан қайтди. Чунки, кетса гишт қолипдан кўчарди. Эри туғмас хотинни икки дунёда олиб келишга бормасди. Шунинг учун шилинган жойларини боғлаб, ҳеч нарса бўлмагандай юраверди. Лекин ўйлаган режасидан чекинмади.

«Мен туғмасам, эрим устимга хотин олиши аниқ. Кундошим туғиб берса, мени ҳайдаб юбориши турган гап. Ҳозир укасига суянади, агар у уйланиб, бола-чақали бўлса, яна менга қийин. Жонон бирор ёққа бош олиб кетса ёки ака-ука юз кўришмас бўлса, эрим боз менга боғланади. Бунинг учун нима қилсам экан», дея бош қотирарди Лазокат. Ана шу ўй-хаёллар уни ўта қабих йўлга бошлади. У кимдандир, бир аёл ўз қайниси билан дон олишиб юрар, лекин эри бундан воқиф эмас

эмиш, деган гапни эшитган эди. «Мен ҳам шу йўлни тутсам, осмон узилиб ерга тушармиди, — деган қарор-га келди. — Эҳтимол айб эримдадир? Шу баҳона ўзим-ни синаб кўришим мумкин. Эркак-ку, бир ишва қилсам, Жонон менга қайишади»...

* * *

Жонон, айтганимиздай, полвон йигит. Унинг келишган сумбати, кенг яғринлари, истарасининг ис-сиқлиги рисоладагидек. У ҳеч қачон хизматдан ноли-майди, қанча кўп меҳнат қилса, шунча роҳатланади. Унинг итоаткорлиги янгаси Лазокатга қўл келади. Шунинг учун Лазокат унга хоҳлаган юмушини хоҳлаган пайтида буюради. Жонон ҳам қайсарлик қилмай буюрилган ишни қойилмақом қилиб бажаради.

Лазокат бир чиркин ишни режалаштириб юрган кунларида, Бектош узоқ қишлоқдаги дўстининг тўйига кетди-ю, Жонон билан Лазокат уйда ёлғиз қолди. Бу Лазокат учун айни муддао бўлди. У ўзига оро бериб, ҳовлига чиқди. Ташқарида, сўрида Жонон ухлаб ётарди. Лазокат беҳаёларча унга яқинлашди, унинг келишган афт-ангорига, бўртиб чиққан мушакларига суқ билан боқди ва супада ўсиб ётган райҳондан бир чимдим юлиб олди-да, Жононнинг бўйни аралаш юзларига райҳон булоғини юргизди. Аввалига ажиб бир ҳузур бағишлаган бу ҳолатдан йигит тебранди, кейин бирдан кўзини очди ва боши тепасида янгасини кўриб, қаддини тиклади. Лазокатдан эркак зотини жумбушга келтирадиган аллақандан хушбўй ҳид таралиб турарди.

— Ҳа, янга, бемаҳалда бу ерда нима қиялпсиз? — ёнидаги кўйлагини кия бошлади Жонон. — Тинчликми ишқилиб?

— Акангизни кутавериб, зерикиб кетдим, — деди Лазокат эҳтирос билан боқиб. — Сиз билан бир оз гаплашиб, кўнглимни ёзай деб чиқдим.

— Мен билан нимани ҳам гаплашардингиз, янга?

Яхшиси, кириб ётинг, мен ҳам чарчаганман.

— Аёлнинг оғушига кирмагансиз-да, аёл лаззатини билмайсиз. Келинг, бир иситиб қўй, — деди Лазокат Жононнинг бўйнига қўл ташлаб, қўйнига кириш ҳаракатига тушди. Жонон ҳушёр тортиб, янгасининг қўлини силтаб ташлади.

— Йигитсиз-ку, нега ўзингизни олиб қочасиз? — эҳтирос билан шивирлади Лазокат ва яна Жонон томон интилди. Бу сафар Жонон уни қаттиқ силтаб ташлади.

— Шарм-ҳаё борми сенда? Уялмайсанми, акамнинг кўзи тирик-ку! — сенсиради Жонон.

Лазокатдаги эҳтирос ўрнини ғазаб эгаллади:

— Шунақами! Ўзинг «чиройлисиз, сизни яхши кўраман», деганингда ҳам акамг тирик эди. Ё эсингдан чиқдимми? — маккорликка ўтди Лазокат.

— Ўша гапни ҳали ҳам чайнаб юрибсизми? Ўшанда ўзингиз «мен чиройлиманми?» деб ҳазил қилганингизда, «чиройлисиз», деганман. Янгам бўлганингиздан кейин «яхши кўраман», деганман-да. Ўша гапни қинғирликка йўяпсизми энди? Уялсангиз бўларди!

— Сен мужаратга кучоғимни очиб, уятсиз бўлдимми ҳали? Сеними! — Лазокат шаъни топталган аёлдек этагини қоқиб, ичкарига кириб кетди. Жононнинг эса тамоман уйқуси қочди. Худди бу томошани кимдир панада туриб, томоша қилаётгандек, қоронғулик қўйнига олазарак боқди ва ўзидан-ўзи уялди. Шу пайт атайин қилингандек, дарвоза тақиллади. Жонон бир муддат қотиб қолди. То ўрнидан қимирлайман дегунча, ичкаридан Лазокат чиқиб, «боряпман, ҳозир», деганча дарвоза томон йўналди. Бектош то ҳануз хотинининг ухламаганига ажабланди.

— Ҳалигача ухламадингми? Дарвозани Жонон очарди-ку.

— Уйқу қаёқда, — норози оҳангда зорланди Лазокат. Бектош ширингина эди. Эр-хотин валақлашиб ичкарига киришди ва иккиси алламаҳалгача гидир-бидир қилиш-

ди. Улар нима ҳақда гапиришаётгани Жононга эшитилмасди. Жонон шу лаҳзада бир шумликнинг «ҳиди»ни сезди ва ўрнидан азод туриб, акаси билан янгаси кириб кетган хона эшигига яқинлашиб, ичкарига қулоқ тутди.

— Эркакмисиз?! — деб йиғларди Лазокат. — Сиз, остона ҳатлаб кўчага чиқдингиз, ўлгур бўйнимга ёпишади-қолади... Ўлар бўлсам ўлиб бўлдим. Ука дегани ҳам аканинг ҳалолига кўз олайтирадимиз? Ҳали тирик-сиз-ку... Эсини киритиб қўймайсизми ё мен иккингизга текканманми? Ўлгурга «акангиз тирик-ку, нега бундай қиласиз?» десам, «акамни ўлдирсам, менга тега-санми?» дейди юзинг қургур...

Бектош ширакайф эмасми, бир нималар деб гулдиради, унинг нима деганини Жонон эшитмади. Лазокат энди эрини гижгижлатди:

— Ўлдининг! Бунақа жигарнинг боридан йўғи яхши! Ўлдирсангиз, ҳеч ким сиздан кўрмайди. «Бирорта қасдлашгани ўлдириб кетган-да», деб ўйлашади.

— Жонон унчаликка бормас, гапинг ёлғон! — Бектошнинг ҳушёр овози янгради. — Маккорлик қияпсан!

— Ишонмайсизми? Қасам ичайми? Агар ёлғон гапирсам, Каломулло...

Бектош хотинининг оғзини ёпди.

— Бўлди, бас!..

— Ана шунақа, агар сиз унинг суробини тортмасангиз, бир куни у сизни ўлдириб қўйиши ҳеч гап эмас. Жувонмаргнинг вазоҳати ёмон. Бир томондан, суйганини олиб бермаганимиз учун ҳам бизга нисбатан ичида алами бор...

Жонон қулоқларига ишонмади. Нима бўлаяпти ўзи? Наҳотки янгаси шу даражада ваҳший бўлса! Акасига нима деб ўзини оқлайди? Хотинининг измига кириб олган акаси унинг айтганларига ишонадими? Бу хотин эртага кўчага чиқиб, шаллақилик қилишдан ҳам тоймайди. Унда нима деган одам бўлади? Ёмғирдек ёгилиб келаётган бу каби саволларга жавоб топиш Жонон учун худди шу пайтда жуда қийин эди. У энг тўғри йўл, бу уйдан бош олиб кетиш, деган қарорга келди ва ўзи ётган сўрига

чиқиб, кўрпа-ёстиқни гўё киши ётгандай қилиб тўғрилади-да, дарвоза томон юрган эди ҳамки, акаси, қўлида болта, сўри томон жадал қадам босди. У телба-тескари қадам босар, ҳозир нима қилаётганини билмасди гўё. Сўрига яқинлашган Бектош болтани даст кўтариб, Жонон ётган ёстиқни чопди. Жонон турган жойида тошдек қотиб турарди. Акасининг ҳаракатлари зое кетганини кўриб, ич-ичидан ачинди ва турган жойидан:

— Ҳа, бадбахт акажоним-а, ўша беҳаё, сизни укангизнинг қонига ташна қилди-я! Ушанга ишондингиз-а! — деди афсус-надомат билан. — Энди акажон, ўша ёлгонингиз билан қолинг, мен учун бу уй ҳаром. Мен кетдим, алвидо, акажон! Энди қиёматда кўришамиз!

Бирдан ўзига келган ака, довдираб қолди. Қилиб қўйган ишидан пушаймон бўлиб, пешанасига бир урди.

— Жонон, мени кечир, гўстоҳлик қилдим, укажон! Мени шайтон йўлдан урди! Орқангга қайт! — дея дарвоза томон қўл чўзди Бектош. Лекин бу пайтда Жонон кўчага чиққан, катта йўл бўйлаб боши оққанг томонга кетиб борарди.

— Қўяверинг, қилган ишидан уялиб қочиб кетаяпти,— деди «шайтон» эрига далда бериб. — Қаёққа ҳам борарди, санғиб-санғиб, яна шу ҳовлига қайтиб келади.

Бу сафар Бектош хотинига тик боқди.

— Тумса, мақсадингга етдингми энди?! — еб қўйгудек кўзларини олайтирди Бектош. — Ҳа, мақсадингга етдинг! Энди талоқсан, ҳа-ҳа, уч талоқсан! Кет бу уйдан, тўрт томонинг қибла!

Лазокат эрининг оёғига ёпишиб, ундан шафқат сўради, лекин Бектош жаҳлидан тушмади. Хотинидан жиркангандек, унга охирги марта бир қаради-ю, ўзини дарвоза томон урди.

— Жонон, мени кечир!.. Орқангга қайт, Жонон...

* * *

Орадан икки кун ўтса ҳамки, Жонондан дарак бўлмади. «Бирорта узоқроқ қариндошимизникига кетган, тафти босилса, эрта-индин келиб қолар», деб ўзига тас-

кин берган Бектошнинг ҳам хаёллари пучга чиқди. Жонон икки ҳафтадан кейин ҳам қайтиб келмади. Бектош жаҳл устида «уч талоқ» деган гапидан жаҳли тушганда ҳам қайтмади. Қариндош-уруғларнинг олдида жаҳл устида айтган гапини такрорлаб, Лазокатнинг жавобини узил-кесил берди. Бунинг учун баҳонаси тайёр эди: олти йиллик турмушда фарзанд бўлмаслиги, Жононнинг аразлаб кетиши ва бошқа сабаблар...

Лазокатнинг акалари арава ёллаб, «бозордан қайтган» сингилнинг кўч-кўронини олиб кетишди. Лазокат яна ёшликдаги қилиқларини эсга олди ва янгаларини чимчилашга ўтди. Янгаларнинг кичиги бу ҳолга узоқ чидамади:

— Ҳали ҳам кўзинг очилмабди-да? Бўлди энди, эски қилиқларингни ташла! Агар шу уйда яшайман, десанг, бизлар билан муроса қилишингга тўғри келади, — деди дангалига.

Лазокат паст келгиси келмади. Хаёлида, паст келса, оёқости бўладигандай эди.

— И-е, қачондан бери бу уйга хўжайинчилик қилдиган бўлдинг? — янгасига бақриб берди. — Онам ўлгандан кейин тилинг бурро бўлиб қолибди-да. Акам, сенга эрк бериб қўйганга ўхшайди. Мен акамга ўхшамайман, жонингни ўзим оламан, шошмай тур! — У тандир ёнидаги касов билан янгасининг оёғига урди. Таёқ зарбидан жони оғриган келин Лазокатнинг қўлидаги касовни тортиб олиб, иккига бўлиб ташлади ва жазава билан:

— Агар яна бир марта қўл кўтарсанг, шу таёқ бошингда синади, — деди. Лазокат ўзини лўлиликка солиб, «янгаларнинг дастидан дод», деб шаддодлик қилди. Лекин акаларнинг бирови ҳам унинг ёнини олмади, аксинча, унга танбеҳ беришди:

— Синглим, бизларнинг ҳам орамизга совуқчилик солмоқчимисан? — деди катта ака. — Қўй, тинчгина яшайлик энди. Шунча шармандалик камлик қиладими сенга?

— Ҳа, хотинларингни қули бўлиб қолибсанларми? — деди Лазокат иддао билан. — Хотинларинг сингилларингдан азиз бўлибди-да! Керак бўлса, мен бу алвас-

тиларнинг халтасини бўйнига илдириб, онасиникига жўнатиб юбораман!

Лазокат беобрўлик қилиб, дийдиё қилди. Кичкина ака сал сингилга қайишгандай бўлди.

— Бўлди, мен янганг билан гаплашиб қўяман, — деб хотинини ичкари уйга бошлади ва синглим эшитсин деб, бир-икки аччиқ гапларини овоз чиқариб айтди, кейин хотинига паст овозда: — Қўй, хотин, шу билан тенг бўлма, — деди. — Ҳозир у аламзада, озгина сабр қилсанг, ўзига келиб қолади. Бир гапдан қолсанг, олам гулистон.

— Кўриб турибсиз-ку, жанжални ўзи бошлайди, — деди янга эрига зорланиб. — Бўлмаса, арини инини ковлаш менга зарил келибдими? Мен ҳам ўзимнинг тинчимни ўйлайман. Ўша индамаса, бизларнинг ҳам қулоғимиз тинч-ку. Баъзан одамнинг жонидан ўтказиб юборади-да.

— Ақлли хотинсан-ку, гапирса ҳам сен гапирма шунга. Биласан, ишдан чарчаб келаман, ортиқча галвага тоқатим йўқ...

Янгалар сабр-тоқатли бўлди, лекин Лазокатга инсоф кирмади: бўлар-бўлмасга, йўқ жойдан жанжал чиқарди.

— Чой дамлаб кел, — деди бир куни янгасига, дарахт соясида ўтириб олиб. Янгаси итоаткорлик билан чой дамлагани кетди-ю, бир оз ҳаяллаб қолди. Унинг ҳаяллагани Лазокатга айил ботди. «Бу атайин шунақа қиялпти», деб ўйлади. Янга чой олиб келди ва дўқ этказиб чойнакни унинг олдига қўйди. Чойнакнинг дўқ этгани Лазокатга зарда бўлиб туюлди.

— Нега чойнакни зарда қилиб қўйдинг? — қошлари чимирилди Лазокатнинг.

— Нега зарда қиларканман? — деди янга сиполик билан. — Қўйинг, Лазокат, қилдан қийиқ ахтарманг, тинч ўтирайлик.

— Тинчингни буздимми ҳали? Акамнинг топганини еб, семириб кетдингми? Эшак семирса, эгасини тепади, деганлари шу-да.

— Ҳаддингизни билинг, Лазокат, — муроасага борди янга. — Қилиқларингиз мана бу еримга келди.

— Менга ақл беряпсанми? — ўрнидан турди Лазокат ва янгасининг сочига чанг солди. — Мен сенга ҳаддидан ошишни кўрсатиб қўяман!

Янга чидаб тутолмади, Лазокатнинг қўлини қайириб ташлади. Инжиқ қизнинг янгага зўри етмади ва жон ҳолатда унинг қўлини тишлаб олди. Янга уни итариб юборган эди, қайнсингил умбалоқ ошиб йиқилди.

— Қонимга ташна қилма! — ўшқирди янга. — Тилингни суғуриб оламан ҳозир!

Можаро устига ака кириб келди. Сингил акага шикоятни бошлаган эди, ака уни жеркиб ташлади:

— Сен яхши бўлсанг, бошқалар ҳам яхши, — деди ака. — Ҳамма айб ўзингда!

Сингилнинг жиғибийрони чиқди ва акага ҳам маломат қилди:

— Хотинингиз тумшуғингиздан ип ўтказиб олганда, унинг чизган чизигидан чиқолмайсиз! — деди акасига алам билан. — Ёлғиз сингилни ҳимоя қилиш қўлингиздан келмайди!

— Шунақалигини биларкансан, сен нега эрингни саришта қилолмадинг бўлмаса? — ака ҳам аччиқ гап қилди. Лазокат мот бўлиб, писиб қолди.

Шу-шу, Лазокат муроса йўлига ўтиб, пати юлинган товукдек сипо тортиб юрди...

* * *

Энди гапни Жонондан эшитиш вақти келди. Жонон шу кетишида Таваккал ота қабристонига борди, ота-онасининг қабри бошида тиз чўкди, бир калима Қуръон тиловат қилиб, қабр тупроғини кўзига суртди. Кейин ўпкаси тўлиб, кўзёши қилди, «узоқ сафарга чиқяпман», деб ота-онасининг руҳидан мадад сўради.

— Отажон, онажон, сизларни безовта қилганим учун узр! Бу ерлардан, яқинларимдан айрилиб, узоқ-узоқларга бош олиб кетаяпман. Ким билади, қайтиб келиш яна насиб этармикан. Мени кечиринглар, мени ҳаммаша қўллаб туринглар, — деди ва бир сиқим қабр туп-

роғини рўмолчасига тугиб, ўрнидан турди.

Жонон қабристондан чиқиб, Қарғаликкача бориб, қишлоғи томон бир қараб олди-да, сўнг қоронғулик қўйнига сингиб кетди. У йўл босар экан, бир вақтлар онасининг кўксига бош қўйиб, отасининг тиззасида ўтириб эркалаганларини эслади ва қалбида хуш бир туйғу жўш уриб кетди.

Жонон Қуватошга етиб келганда, беихтиёр қадами секинлашди. У болалигида бу жой ҳақида эшитган эди, ичига ваҳима тушди. «Қуватошда ёлғиз қолган кишини ажиналар қиз бола овозида чақирармиш, орқангга қарасанг ё «ҳа» десанг, тамом, жонингдан умидингни узавер», деган гаплар бор эди. Шуларни эслаб, Жонон елкасидан биров босгандек оғирлашди. Орқага қайтай деса, Қуватошдаги жинлар: «ҳа, қўрқдингми?» деб орқасидан қувадигандай бўлди. У ўзини ўнглаб, таввакал олдинга интилди.

Қуватош тоғнинг энг баландида бўлиб, йўл Қуватошнинг ўртасидан ўтарди. Ингичка йўл, бир отлиқ зўрға сиғади. Сал эҳтиётсиз қадам боссанг, тамом, асфаласофилинга кетдим, деявер. Жонон бу йўлни қандай босиб ўтганини билмайди. Назарида йўл уч бараварга узайиб кетганга ўхшади. Йўлнинг ҳар ўттиз-қирқ қадам ерида гор бўлиб, оғзи одам бўйи келади. Лекин бу горларга киришга ҳеч ким ботинолмас эди. Айтишларича, бу горларда жинлар яшармиш. Тоғнинг баланд жойи бўлганиданми ёки ҳамиша шабада эсганиданми, гор ичидан аллақандай гувиллаган товушлар эшитилади.

Жонон хавфни ортда қолдириб, тоғдан пастга энганда, тонг ёриша бошлади. У қанча юрди аниқ эмас, лекин қаттиқ чарчади. Нафасини ростлагани бир харсанг устига ўтирди. Қанча ўтирганини билмайди, бир пайт отнинг дупури эшитилди. Қараса, ўзидан ўн-ўн беш қадам нарида икки отлиқ турибди. Уларнинг бири отдан тушиб, Жононга яқинлашди.

— Кимсан, қарга кетаяпсан, бу ерларда нима қилиб юрибсан? — деб Жононни саволга тутди у.

Жонон улардан сув сўради.

— Сув? Сувимиз йўқ...

— Ҳеч кимим йўқ. Мардикорликка чиққан эдим, — деди Жонон. — Қарга боришимни билмай, адашиб қолдим.

Кишининг кўмаги билан Жонон отга мингашди. Улар аллақанча йўл босиб, бир қишлоққа етдилар. Дарвозани хизматкор очди. Отларнинг жиловидан тутиб, ичкарига олишди. Жонон ҳовлига кириб, аллақайси бойникига келиб қолганини билди.

Эрталаб ёши ўтинқираган бир хизматкор Жононни бойнинг олдига олиб кирди. Бой басавлат, озода кийинган, мошгуруч соқоли кузалган, истараси иссиқ одам эди. Унинг исми Муродбой экан. У Жононни салимий кутиб олди.

— Яхши йигитга ўхшайсан. Қўлингдан қанақа ишлар келади? — деб сўради.

Жонон саволларга жавоб бераркан, молбоқарлигини қистириб ўтди. Бой кўпни кўрган эмасми, Жононнинг ўтириб-туришини, овқатланишини, гап-сўзини эшитиб, «бу йигит камбағалнинг боласи эмас», деган хулосага келди. Шу пайт бир-бирига қуйиб қўйгандай, икки йигит хонага кириб келди ва таъзим қилиб, уларнинг олдидан жой олди. Бир оз фурсат ўтгач, бой ҳозиргина келиб ўтирган йигитларни кўрсатиб, Жонондан сўради:

— Бу икки ака-уканинг қай бирининг ёши катта?

Жонон уларга боқиб, пойгакда ўтиргани «укаси», юқорида ўтиргани «акаси», деб жавоб бераркан, бой яна ундан сўради:

— Қандай билдинг?

— Бой ота, ҳеч қачон ука акадан юқори ўтирганми? Ёки акадан олдин ука дастурхонга қўл узатганми? — деди Жонон.

Бой унинг зийраклигига тасаннолар айтиб, исмини сўради:

— Исингни айт, ўғлим?

— Агар лозим топсангиз, исмимни кейинроқ айтсам, — деди Жонон.

— Майлинг, — деди бой ва эртаси кунидан барча

қўйларини Жононнинг ихтиёрига топширди ва унга фуломгардишдан эмас, алоҳида хонадан жой кўрсатди.

Жонон бошқа хизматкорлардан барвақт турар, тезда тамадди қилиб, қўйларни яйловга ҳайдарди. Бойнинг буюрган ҳар бир ишини унинг таъбига монанд қилиб бажарарди.

Орадан ярим йилдан кўпроқ вақт ўтди. Бой кўраларини айланиб, Жонон боқаётган қўйларга назар ташлади ва кўзларига ишонмади. У қўйлар семизлигидан қуйруқларини зўрға кўтаришарди. Бой Жононнинг хизматидан мамнун бўлиб:

— Умрингдан барака топ, ўғлим, икки дунёнг обод бўлсин! — деб дуо қилди. — Ўғлим, менга ёқиб қолдинг ва кўнглимдан бир ният кечди. Агар шу йил қўйлар қўзилаганда, нечаси оқ тусли туғилса, ўшаларнинг ҳаммаси сеники!

— Ҳимматингизга тасанно! Кейин айтиб қолмайсизми? — деб кулди Жонон.

— Сўзим сўз. Мен битта гапираман, сўзидан қайтган номард! — гапини қатъийлаштирди бой...

Жонон қўйларни кўздан кечириб, ҳур-ҳур шабадада боқиб юрган эди, осмондан қандайдир ёғду қуйилиб, қўйларни ёритди. Жонон «бу ўнгимми, тушимми», деб ҳайратга тушди. Шу воқеадан кўп фурсат ўтмай, қўйларнинг учдан икки қисми оқ тусли қўзилади.

Бундан хабар топган бой яйловга етиб келди ва ҳайратдан ёқа ушлади:

— Ё қудратингдан! Бу қандай мўъжиза бўлди?! Ҳа-ҳа, бу Аллоҳнинг каромати!.. Кўнглинг жам бўлсин, гапим гап, оқ қўзиларнинг бари сеники, — деди бой.

Жонон мийиғида кулди.

— Бой ота, мен бу қўзиларни олмайман, молингиз ўзингизга буюрсин, — деди. Бой Жононга яна бир марта қойил қолди ва яна исмини сўради:

— Ҳеч бўлмаса, энди исмингни айтарсан?

Жонон сукутга чўмди. Чунки, яқинда бойнинг маъракасида хизмат қила туриб, ўзининг ўтмиши ҳақидаги бир гапни эшитган эди. Гурунгда кимдир:

— Ким биледи дейсиз, янгасига «сизни яхши кўраман», деган экан-ку, ўша йигит, — деб қолди.

— Йўғ-е, охирзамон бўлаяптими? — ажабланти бошқаси. — Акаси тирик бўла туриб, янгасига тегинса? Бундай укани бахридан кечиш керак!

— Қизиталоқ қилғилиқни қилиб, қочиб кетганмиш. Акаси аччиқ устида хотинига «уч талоқ» деб юборибди.

— Сизлар бошқача эшитибсизлар, — дея гапга аралашди бир мўйсафид, — ундай эмас. Ўша янга, бечора йигитчага тўхмат қилганмиш. Қилмиши ошкор бўлгач, ака хотинини уйдан қувганмиш.

— Ундай бўлса, ўша манжалақи баттар бўлсин! Бунақаларни тошбўрон қилиш керак!..

Жонон бу ҳангомадан кўнгли хуфтон бўлди. «Демак, ҳамма жойда биз ҳақимизда гап-сўзлар юрган экан-да, — деб ўйлади Жонон. — Ҳамма билганича қўшиб-чатиб юрибди: биров лаънатлайди, биров ачинади. Яхшиям бу ерда мени ҳеч ким танимайди. Йўқса, қандай бош кўтариб юрар эдим? Энди орқага йўл йўқ. Қалбим соҳибаси Руқиядан ҳам ажралдим».

Ана шу гаплардан андиша қилиб, Жонон бу сафар ҳам исмини яширди.

Бугдой ўрими маҳали, ўроқчилар етишмайди. Бой чўпонларни ҳам далага ҳайдади.

— Ўғлим, эрта эрталаб сен ҳам бугдой ўримига борасан. Икки-уч кунда айтилган ернинг бугдойини ўриб тугатсанг, тезда қўй-қўзиларинг олдига қайтасан, — деди бой Жононнинг елкасига қоқиб.

Жонон рози бўлиб, ўроғини ўткирлаб, ишни шу кечаси, ой ёруғида бошлади. Хўжапишиқ пирдан мадад сўраб, ишга киришди. У ўрганларини уюм-уюм қилиб кетаверди. Тонгга яқин ўзига ажратилган ернинг бугдойини ўриб бўлди-да, сўнг бир боғ бугдойни бошига ёстиқ қилиб, уйкуга кетди. Эрталаб қаватига беш йигитни олиб, далага келаётган бойнинг кўзига Жонон ўрган бугдой уюмлари гўёки далада қўй-қўзилар галаси бўлиб кўринди ва унинг жаҳли чиқди.

— Ишонган тоғда кийик бўлмас, дейдилар, — деди бой ғазабланиб. — Кўраяпсизларми, Жононга эрталаб келиб тургин, ўримни бошлайсизлар, дегандим. Ҳали-гача келмабди. Буғдойзор қаровсиз қолиб, қўйлар босиб кетибди!

Улар яқинроқ келишса, қўй-қўзилар эмас, ғарам-ғарам буғдой пояларини кўришди. Жонон эса хуррак тортиб ётибди.

— Ўғлим, сен мени яна лол қилдинг, — деди бой Жононни алқаб. — Айтгин, ота-онанг ким, исми нима, қайси элнинг боласисан?

Жонон бу сафар айтди:

— Бой ота, юртимнинг номи «Бетайин», исмим эса «Отанга лаънат».

Бой ҳар қанча қистаса ҳам Жонон сирни ошкор қилмади. У ўзича ўйларди: «Тўғри-да, уйдан чиқиб кетган бўлсам, юртим бетайин бўлса, янгамнинг туҳматидан кейин мени ҳамма «Отанга лаънат» деб эсласа, албатта юртим бетайин, исмим шунақа бўлади-да»...

Муродбойнинг ҳуснда беназир, ёлғиз қизи бўлиб, келган совчиларга рад жавобини берарди. Қиз жуда мағрур эди. Шу сабабли бой изтироб чекар, «ёлғиз қизимни узатсам, шунча молу дунём кимга қолади», деб қайғуларди. Бойнинг нияти — яхшироқ йигитни ичкуёв қилиб, ҳузур-ҳаловатда яшаш эди.

Тақдир-да, қиз Жононни зимдан кузатиб юрган, унга пинҳона ошиқ эди. Қизнинг қарашларига йигитнинг парвосизлиги унинг бағрини ўртарди. Бир куни қиз дабдурустан йигитнинг олдига кирди. Жонон унга қиё ҳам боқмади.

— Сизга нима керак? Нега менинг хонамга кирдингиз? — деди Жонон унга қарамасликка ҳаракат қилиб.

— Менга сиз кераксиз, сизни севиб қолдим, — деди қиз. — Отамнинг молу давлати сизга бўлсин, дегандим.

Тўғриси, тоғ боласи эмасми, қизнинг ҳусну жамолига маҳлиё бўлиб, Жононнинг томирида қон кўпирди. Қиз янада яқинроқ сурилди. Шу пайт йигитнинг димо-

ғига аллақандай хушбўй ҳид урилди ва у бирдан хушёр тортди. Бу ўша тунда, янгасидан анқиган ҳидга ўхшарди. Қизнинг шивирлаши илоннинг вишиллашига ўхшади.

— Мени тинч қўйинг, чиқиб кетинг! — деди Жонон қизни ўзидан четлатиб.

Бу қизнинг ҳамиятига тегди ва жаҳли чиқди:

— Ху, юрти бетайин, отанга лаънат! — ҳақорат қилди қиз. — Нимангга кериласан бунча, ялангоёқ?!

Жононнинг ғурури қўзиди:

— Менга бойлик керак эмас, — деди ўрнидан шаҳд туриб. — Давлатим отангникидан кам эмас. Исмим ҳам ўзимга муносиб — Жонон!

Шундай деб, Жонон бу хонадондан чиқиб кетди. Қиз бўлиб ўтган воқеани отасига айтди. Бой Жононнинг орқасидан от қўйди ва унга етиб, қайтишини илтимос қилди. Жонон кўнмади. Унинг қайтмаслигига кўзи етган бой:

— Ҳеч бўлмаса, хизмат ҳақингни олиб кетсанг-чи! — деди.

— Қилган хизматларимга розиман, сиз ҳам берган нон-тузингизга рози бўлинг, — деди Жонон. — Агар истасангиз, ҳақимга дуо қилинг!..

* * *

Жонон Афғон юртида, бир чол-кампирнинг хонадо-нида паноҳ топди. У чолнинг қаровсиз қолган ерларини чопиб-суғориб, экин экди, молини боқди. Кексаликда ҳузур-ҳаловат топган чол-кампир туну кун Жононнинг дуосида бўлди. Жонон ўз уйида юргандай ҳис этди ўзини ва ғайрат қилиб ишлади. Қишлоқ одамлари ҳам унга ўрганиб қолди. У бўш вақтларида бошқаларнинг ҳам то-морқасида ишлаб, юмушларига ёрдамлашди.

Ажойиб кунларнинг бирида шу қишлоқнинг бойи ўғлига тўй бериб, кўпкари солди. Жонон кўпкарини соғинган эди. Қани энди, саман оти бўлса-ю, кўпкари ўйнаса. У шу хаёл билан ёнидаги чолнинг отига маҳлиё бўлиб қаради. Йигитнинг қараши чолга таъсир этди.

- Ҳа йигит, чопгинг келаяптими?
- Отингизни бериб турсангиз, чопар эдим.
- Майли, мана, бахтингни синаб кўр.

Жонон сакраб отга минди-да, шамолдай ўзини тўда-га урди. Кўп ўтмай улоқни маррага келтириб ташлади. Солимга бир от ва гилам олган Жонон уларни чолнинг олдига қўйди. Чол йигитнинг мардлигига қойил қолиб, ютуқни рад этди ва уни меҳмондорчиликка таклиф қилди. Бу чол ҳам бой-бадавлат кишилардан эди.

Кун оралатиб, Жонон уникига меҳмонга борди. Бойнинг хизматкорлари уни иззат-икром билан кутиб, соясалқин боғчада қўйилган сўрида дам олиб ўтирган бойнинг ҳузурига бошлашди. Бой азиз меҳмонни кўриб, боши осмонга етди.

— Э, хуш келдинг, ўғлим! — деди бой ва ёнидан жой берди. «Сизларга айтган йигит шу-да», деб уни хизматкорларига таништирди ҳам. Шу пайт бойнинг ёнида ўтирган қиз одоб билан таъзим қилди-да, юзини рўмоли билан тўсиб, ичкарига кириб кетди. Жонон беихтиёр, ўзи сезмаган ҳолда қизнинг орқасидан қараб қолди.

Шу куни алламаҳалгача зиёфату суҳбат давом этди. Лекин нимагадир, йигитнинг икки кўзи ичкарида бўлди, «қиз яна бир кўриниш берармикан», деган ўй-хаёл уни банди этганди. Нега бунақа хаёлга берилганини билмасди Жонон. Ахир, «хотин зотига қарамайман», дегувчи эди-ку! Бу нимаси? Нечун бу қизнинг бир боқиши уни довдиратиб қўйди?

Жонон суҳбат мавзусидан билдики, бойнинг бир ўғли ва қизи бўлиб, ўғли қўшни қишлоқ йигитлари билан бўлган тўқнашувда ўлган ва бой шу ёлғиз қизига суяниб қолган. Сафарбой исмли бу бой Жононни ёқтириб қолган, ўзича «қани энди, шу йигит куёв-ўғлим бўлса», дея қўнглидан бир ниятни ўтказган экан. Меҳмондорчиликнинг охирида, Сафарбой:

— Рози бўлсанг, яйловдаги чўпон-чўлиқларим-у, ҳовлимдаги хизматкорларимга бош бўлсанг, — деган таклифни ўртага ташлади. Бойнинг қизига пинҳона

ошиқ бўлган Жонон таклифга дарров рози бўла қолди.

Кунлар ўтган сайин Жонон бу уйга қаттиқроқ боғланиб борарди. Узун қиш кечаларида уйқуси қочиб, ширин хаёлларга берилар, қизни ойдек ҳусну жамолини ўзича кўз ўнгида гавдалантирар, унинг ёқимли жилмайишига ўзича жилмайиш билан жавоб берар, ўтган қайтганда рўбарў келиб қолганларида, қизнинг ҳаё билан юзини яшириб ўтишларини эслаб, аллақандай интиқлик билан энтикиб қўярди. Тушларида ҳам қизни кўрарди. Нуржаҳоннинг ҳам қўнглида Жононга нисбатан нимадир бор-у, лекин буни Жононга сездирмасди.

Жонон Нуржаҳонни боғда ёлғиз кўрди-ю, унга пешвоз юрди. Боғ жуда гўзал, ундаги дов-дарахтлар, анвойи гуллар кишининг баҳри дилини очиб юборар даражада эди.

— Саломатмисиз? — Нуржаҳон йигитдан олдинроқ сўроқни бошлади.

— Шукр! — Жононнинг бошқа сўзга тили айланмади. Довдираб қолди ва гул бутоғидан гул узиб, қизга тутди.

— Раҳмат, — гулни лабига босди қиз.

— Шу гулдек очилиб юринг!

— Сиз ҳам, — деди қиз ва тезда орқасига бурилиб кетди. Унинг билакдек икки ўрим сочи белида саллона ўйнардики, Жононнинг ичи қизиб кетди...

Сафарбойнинг қўшниси қизини узатадиган бўлди. Бу элда тўйлар айтишувсиз ўтмаскан. Бўйи етган қизлар норғул йигитлар билан айтишиб, бир-бирига шу баҳона дил изҳори қилишаркан. Тўй базми деган куни Нуржаҳон ийманибгина гап бошлади:

— Жонон ака, бу кечқурун Гулноранинг тўйида айтишув бўлади. Бизда одат шунақа. Сиз ҳам қатнашинг.

Жонон бирор марта айтишувга қатнашиб кўрмаган. Унинг қандай бўлишини тасаввур этолмасди.

— Айтишувда нима бўлади? — деб сўради у.

— Байт айтилади, — тушунтирди Нуржаҳон, — қизлар бир байт айтади, шунга мос тарзда йигит ҳам жавоб қайтаради.

— Мен ким билан байт-барак қиламан?

– Танлаганингиз билан. Танлаганингиз бор чиқар?
– Бор, — дадил айтди Жонон.
– Ким экан у пешанаси ярқираган қиз?
– У — сизсиз, Нуржаҳон.
– Ёлғон айтасиз, — деди қиз ва уялибгина нари чекинди...

Базм қизигандан қизиди. Бир пайт Нуржаҳон айтган айтишувга навбат етди. Бир йигит қўлида тугунча, байт айтиб, уни бир қизга берди. Қиз ҳам ўз навбатида байт айтиб, йигитга таъзим бажо этди. Йигит яна байт айтди, қиз яна жавоб қайтарди. Шу зайл байт-барак узоқ давом этди. Яна уч-тўрт йигит-қизнинг айтишуви-дан кейин гал Жононга етди.

Жонон кўп ғазалларни ёддан билгувчи эди. Бу ҳақда юқорида сўз боргани эсингизда бўлса керак. У бир қадам олдинга чиқди-да, қўлидаги тугунчани Нуржаҳонга беришдан олдин, дил изҳори қилди:

Гул каби ёнган ёноғинг, чертди қалбим торини,
Сен каби рухсорага изҳор этай қалб зорини.

Ва тугунчани қиз қўлига берди. Қиз лола янглиғ қизариб ерга боқди, сўнг жавоб сўзини айтди:

Инжудек сўз тердингиз, хуш келдингиз, таъзимдамиз,
Сиз билан куч бирламас, тенг бўлурмиз назмда биз.
Тўй баҳона айтишайлик, куч синашиб ушбу кун,
Чароғон айлаб кўнгилни, яйрашиб базмда биз.

Нуржаҳон қўлини кўксига қўйиб, «навбат сизга» дегандек, таъзим қилди. Жонон саволга чоғланди:

Зебо-ю, қадди суманбар, лаблари ғунча мисол,
Сўзлари малҳам кабидир, қошлари худди ҳилол.
Майли эрди, эй санам қиз, мангуга этсанг таъриф,
Мен бир асиринг бўлайин, сен эса ёнимда қол.

Бу байтдан кейин қизлар қаҳқаҳ отиб кулишди. Жонон «байтим қизларга хуш келмади чоғи», деб ўйладими, Нур-

жаҳонга гал бермай, ушбу байтни айтиб юборди:

Севсангу севилмасанг, сенга олам бир қафас,
Эр йигитни сўз билан енгишлари осон эмас.
Қиз-йигит даврон суриб, ишқ бодасин нўш урсалар,
Покиза севгини, дўстлар, майли қилсинлар ҳавас.

Нуржаҳон «енгилдим» ишораси ила таъзим қилди ва даврада шўх кулги янгради.

Шу тўй баҳона Нуржаҳон билан Жонон бир-бирларига анча яқин бўлиб қолдилар. Эндиги учрашувлар янада ширин суҳбатларга, бундан-да гўзал байтларга қоришиб ўтди...

Қиссамизни тинглаётганлар «Руқия нима бўлди?» деб сўрашлари турган гап. Жонон Руқиянинг васлига етолмаган бўлса-да, у ҳақдаги ширин хаёлларни бир сонияга бўлса-да, унутгани йўқ. Нуржаҳонда Руқияда бўлган ҳусну тароват, одоб-ибо каби жиҳатларни кўргани учун ҳам унга кўнгил берди. Биринчи севгидан зада бўлган кўнглига таскин топди, дейиш мумкин. Яна ким билади, дейсиз.

Хуллас, икки ёшнинг ўртасидаги муносабат оналарга ҳам аён бўлди. Сафарбой ўйлаган ниятига етди чоғи, Жононни ҳузурига чорлаб:

— Ўғлим, — дея салмоқлаб гап бошлади, — йигитга ёлғизлик ярашмайди, уйланишинг, бола-чақа орттиришинг даркор. Агар кўз остингга олганинг бўлса, айт, ўзим бош бўлиб, бошларингни қовуштириб қўяй. Ўғлимдай бўлиб қолдинг, отанг қаторидаги одамман.

Жонон ўнғайсизланиб, қизарди-бўзарди, ичидагини ташига чиқаролмай қийналди, охири:

— Суйганим бор, — деди бошини хам қилиб.

Сафарбой чўққи соқолини силаб, хавотир билан сўради:

— Уялма, айт, суйганинг кимнинг қизи, мен танийманми?

— Ҳа, танийсиз... — қолганига Жононнинг тили айланмади.

— Танисам, айт, ким экан у? Кимлигини айтсанг бўлди...

— Агар рухсат этсангиз, буни синглингиз Ҳикоят холамга айтсам.

— Майли, ўғлим, менга айтишга уялсанг, бу ишинг ҳам маъкул. Кимлигини Ҳикоят холангдан билиб оламиз-да...

Ҳикоят хола Сафарбойнинг суюмли синглиси, тили ширин бўлгани билан бирга ошу овқатга уста — пазан-да аёл. Болажонлиги, меҳрибонлиги, оққўнгиллиги ҳаммага бирдек ёқади. Жононга бошқача бир меҳр билан қарайди, ўз ўғлидай суяди. Жонон ҳам ўз ўрнида хола-ни ҳурмат қилади, бировларга айтолмаган дардини унга айтади, маслаҳатини олади. Нуржаҳонга бўлган муносабатини айтганида, хола кўйлагига сиғмай кетди. Чунки у акасининг нияти ҳам шу эканлигини биларди.

Ҳикоят бамисоли совчи мақомида акаси Сафарбойнинг хонадонига кириб борди.

— Ҳа, синглим, яхши юрибсанми, болаларинг тинчми? — деб ҳол-аҳвол сўради ака.

— Шукр, ҳаммаси яхши, — деди Ҳикоят хиёл жилмайиб. У акасини хурсанд қилиш учун юраги така-пука эди. — Мен Нуржаҳонга совчи бўлиб келдим, ака.

Сафарбой ялт этиб синглисига қаради:

— Кимга сўраб келдинг?

— Айтаверайми?

— Совчи деган ичидагини тўкиб солади-да! Айтавер, сени қувиб солармидим.

— Жононга сўраб келдим, ака, — деди Ҳикоят акасининг юзига синовчан кўз ташлаб. Сафарбой ич-ичидан хурсанд бўлса-да, бу хурсандчиликни ташига чиқармади.

— Шунақа де, — деди ўсмоқчилаб. — Ўйлаб, маслаҳатлашиб кўрамиз. Лекин сен ноумид бўлма...

Акаси минг яширса ҳам Ҳикоят унинг мақсадини гап-сўзларидан билиб олди ва бу хабарни Жононга етказиш учун апил-тапил ўрнидан турди-да, уйи томон кетди.

Сафарбой кўп ўтмай элни йиғиб, тўй кунини эълон қилди. Айтилган кунни тўй ҳам шоду хуррамлик билан ўтди. Ёшлар бир-бирининг висолига дохил бўлди...

* * *

Бектош Жонон кетгандан кейин анчагача гаранг-сиб юрди, уни не-не жойлардан сўроқламади — тополмади. Лазокат кетди, бир ўзи ҳайҳотдек ҳовлида ёлғиз қолди. Қўй-қўзиларига қарашга ҳам хафсаласи бўлмай, мардикор ёллади. Ош-овқатига қўли айланмай, амаки-си Рўзбойнинг болалари унга гоҳ овқат олиб келиб, гоҳ ўзини уйларига олиб кетиб юрди.

Эркакнинг яккабошлиги оғир. Бектошнинг бу аҳволда сўққабаш юриши қариндошларга ҳам маломат ёғдирди. Бу маломатлардан қутилиш учун Бектошга хотин излашга тушишди. Ҳа демай, келин бўлмиш топилди. Қўшни қишлоқлик Назарқул деган кишининг Фотима исмли қизини Бектошга тушириб беришди.

Фотима кўркам бўлмаса-да, истараси иссиққина аёл, одоби мақтагулик. Иккаласи тез тил топишди ва ширин турмиш кечира бошлашди. Лазокат буни эшитиб, бир куйди, бир куйди, энди минг қилсин, жойига тушмайди. Шунақа, ҳамманинг ёмонлиги ўзига.

Турмуши ширин, рўзғори тўкис бўлмасин, Бектош баъзида укасига қилган ноҳақлигидан куйиниб, кечалари тўлғониб чиқарди. Бир куни унинг эшикдан кириб келишини илҳақ кутарди. Қани, ўша кун тезроқ кела қолсайди.

Кунлар ойларни, ойлар йилларни қувиб ўтаверди. Кўнгил баъзан таскин топса, баъзан хуруж қилиб, ўрта-нади. Лекин начора, бу — ҳаёт, бу — тақдир...

Бектош ширин турмушидан Ҳундибой, Қозоқбой, Абдумажид деган уч ўғил кўрди. Фотима соғ-саломат, болалари ва эрига вафодор, мунис аёл...

* * *

Жонон Нуржаҳон билан жуда иноқ яшади ва тўрт ўғилнинг ота-онаси бўлишди. Нима бўлди-ю, кичик ўғил ҳеч кимга уйқу бермай, шу кечаси жуда кўп гиншиди, онасига тинчлик бермади. Жононнинг ҳам кўзи илингани йўқ. Бола касал эмас, лекин нимагадир инқиллайди.

— Онаси, — деди Жонон хотини томон ўгирилиб,

худди шу йиллар ичида бир нимани кашф этгандай. — Шу ўтган эру хотинлик йилларимизда сени хўп кузатдим, лекин бирорта боламизга алла айтганингни эшитмадим. Қани, бир алла айтгин-чи, зора бола ором олса.

Нуржаҳон қимтинди:

— Алла айтишни билмасам, нима қилай? — деди хижолат тортиб.

— Алла эшитиб улғайган боланинг қалби тоза, ота-онага, элига меҳрли бўлади.

— Сиз бунӣ қардан била қолдингиз?

— Ёшлигимда Ҳожар бувим менга алла айтгувчи эди. Ақлимни танигандан кейин ҳам у бу ҳақда жуда кўп афсона-ю эртаклар айтиб берган.

— Унда алланинг бир-икки сўзини айтинг, мени уни боламнинг қулоғига қуяй бўлмаса, дадаси.

Жонон бир зум болалик йилларига қайтди: бобоси, бувиси, ота-онаси, униб-ўсган қишлоғи кўз олдидан ўтди. Ҳожар бувиси айтиб берган бир афсона эсига тушди. Ўша афсонада айтилишича, қадим замонда, жуда узоқ томонда бир золим подшоҳ ўтган экан. У подшоҳнинг зулмидан озор чекмаган одам йўқ экан. Унинг зулмидан безор юрт фуқароси жам бўлиб, «нима қилсак, бу золимнинг кўнглида раҳм-шафқат уйғота оламиз», деб бир-бирига маслаҳат солибди. Лекин ҳеч кимдан тайинли фикр чиқмабди.

Подшоҳнинг кенжа хотини фаросатда, ақлу идрокда танҳо бўлиб, камбағалпарвар экан. Шу боис кўпинча кундошларидан, сарой аъёнларидан гап эшитар, азият чекар экан. У ҳам аҳли фуқаронинг ҳолига ачиниб, уларга кўмак бериш йўлини ахтарибди. Бир куни подшоҳ уйқуда эканлигида, боласининг бешигини тебрата туриб, аллақандан бир сеҳрли овозда алла айта бошлабди. Алла сўзлари аламли, ҳасратли, ота-онанинг фарзандга меҳр-муҳаббати, ўтмиш ва келажак, ҳақсизлик, адолатсизлик ҳақида экан. Подшоҳнинг уйқуси қочиб, хотини айтаётган аллага қулоқ тутибди. Аёл жўшиб-жўшиб алла айтибди:

Жоним болам, айланайин, алла,

Кокилингга бойланайин, алла,
Тоғда ўсган оҳулар-о, алла,
Учган қушга айланайин, алла.
Алла-ё, алла.
Жоним болам, ўсиб унгин, алла,
Булбул бўлиб гулга қўнгин, алла,
Ўсиб-унган қишлоғимни соғиндим-а, алла,
Хаста дилга малҳам бўлгин, алла.
Алла-ё, алла.

Туғишгандан йироқдаман, алла,
Бир кўришга фироқдаман, алла,
Хазон бўлган бир гул каби, алла,
Кундан-кунга сўлмоқдаман, алла.
Алла-ё, алла...

Юраги тошга айланган подшоҳнинг бу алла таъсирдан кўнгли ийиб, кўз ўнгида онаси, отаси, болалиги, ўтган ҳаёти гавдаланибди ва умри бино бўлиб, бирор марта бирорта фарзандини эркаламаган, уларнинг юзига бирор марта қиё боқмаган подшоҳ боласини бешикдан олдириб, эркалабди.

Шу куни у аллақандай хуш кайфият билан тахтга ўтирибди. Зиндондаги бандиларни озод қилибди, ўлимга ҳукм қилинганларни афв этибди. Ҳақиқатни билган раият маликанинг фаросатига тасаннолар айтибди, умри узоқ бўлишини тилаб, дуолар қилишибди...

Жонон ўз ҳикоясини тугатаркан, қулоғига аллақандай соҳир овоз чалингандай бўлди. Бундай қайрилиб қараса, Нуржаҳон бешик тебратиб, алла айтаётибди, бола эса ором олаётибди.

* * *

Сафарбой билан аёли вақти-соати етиб фано олампидан бақо оламига рихлат қилгач, унинг мол-давлати Жононга мерос қолди ва у табиийки, юртнинг энг бой одамига айланди. Аммо ёши бир жойга борган сари унинг юрагида туғилиб ўсган ерга, она-Ватанга бўлган

ишқ алангаланиб борарди. Боломонота қишлоғини, у ерда қолган яқинларини соғинарди.

У туш кўрди. Тушида тўққиз-ўн ёшларда эмиш. Катта сув бўйида ўтирганмиш. Сувнинг нариги томонида отаси нимадандир хафа, бошини соллантириб ўтирган эмиш. Отаси уни чақирибди. «Ўғлим, сени соғиндим», дебди. Жонон унга интилибди, лекин ўртадаги сувдан ўтолмай, соҳилда у ёқдан-бу ёққа чопибди...

Жонон оҳ уриб, уйқудан уйғонди. Нуржаҳон эрининг ҳолини кўриб, безовталанди:

— Дадаси, сизга нима бўлди? Ёмон туш кўрдингизми?

Жонон бир нима демади. Нима десин, шу пайтгача айтмаган гапини айтсинми? Юртимни соғиндим, десинми?

Жонон Ватан, юрт соғинчи билан яшаётган кунларнинг бирида бойваччалардан бири ўғлини суннат қилиб, кўпқари берди. Жононнинг икки ўғли ўртага тушди, улоқнинг бари ўшаларники бўлгач, ерликларнинг гаши келди.

— Ҳой, келгиндининг улиси, қурисанг-чи ота юртингга! — деди кимдир. Бу баҳодир йигитнинг ҳамиятига тегди ва таъна қилган йигитни даст кўтариб, ерга урди. Қарашса, жанжал катталашадиган, орага оқсоқоллар кирди. Шу куни дили хуфтон икки ўғил отаси қаршисида тиз чўкди:

— Отажон, биз қай элнинг боласи? — деб сўрашди.

Жонон нима дейишини билмай, лолу ҳайрон эди. У хаёлга берилиб, чуқур-чуқур нафас олди ва ҳақиқатни ўғилларига айтди.

— Э, отажон, унда бу ерларда нима қилиб юрибмиз? Кетамиз ўша юртга! — деди ўғиллар бирваракайига. Ўғилларнинг шижоатини кўриб, отанинг чехраси очилди. Эртаси куни юрт оқсоқолларини йиғиб, қўй сўйиб, уларни меҳмон қилди ва зиёфат охирида мақсадини уларга айтди.

— Мендан рози бўлинглар, мен ҳам сизлардан розиман, — деди Жонон таъзим қилиб. — Энди бизга жавоб беринглар, элимизга қайтсак.

Йиғилганлар орасида ғала-ғовур пайдо бўлди.

- Нега кетар экансизлар?
- Бир-биримизга ўрганиб қолган эдик-ку!..
- Қуда-анда, ёру-дўстларингиз-чи?
- Бизларни ташлаб кетишга кўзингиз қиядими?...

Жонон қарори қатъий эканлигини айтгач, халқ уларга оқ йўл тилади. Юрт жамолига ташна юраклар, бир кичик карвон тузаб, карвонда Жонон, Нуржаҳон, тўрт ўғил, уч келин, бир неча нафар неваралар, беш-олти туя юк ва саноқсиз қўйлар, содиқ хизматкорлар — йўлга тушди.

Карвон Фориш тоғларига яқинлашгач, Жононнинг юраги ҳаприқиб кетди. Она-юрт томондан эсган эпкин уни маст қилган эди. Унинг кўз ўнгида сеvimли Руқия-си, акаси Бектош ва болалигида унга эш бўлган дўстларининг қиёфаси бир-бир гавдаланди.

Серсув, серўт, дарахтзор билан бурканган бир ерга етганларида, Жонон карвонга дам берди. Ўтов тикиб, ерга оёқ қўйишди. Узоқ йўл машаққати ҳолдан тойдирган эканми, ҳаммалари уйкуга кетишди, қаровсиз қўй-қўзилар шу яқин атрофдаги экинзорга тарқалиб, бир қанча жойни пайҳон қилди. Ер эгалари етиб келиб, манзарани кўриб, жаҳллари чиқди.

— Ҳой, гафлат босган бандалар, нега экинларни пайҳон қилдингизлар? — ўшқирди улар. Жонон тезда хизматкор ва ўғилларини уйғотиб, ер эгалари билан муроса қилишни буюрди.

— Товонини тўлаймиз, — деди ўғиллардан бири. — Келинглار, отамизнинг олдида бирпас ўтиринглар.

Ер эгалари Жононнинг қаршисида ўтиришди:

— Отахон, бу нима деган гап! — деди бирови. — Йил бўйи қилган меҳнатимизни кунпая-кун қилибсизлар.

Жонон мулойимлик билан гап бошлади:

— Биздан ўтган бўлса, кечиринглар, болаларим. Товонини мен тўлайман. Аввал бир пиёла чой ичиб, нафасларингни ростлаб олинглар, кейин гаплашаверамиз, — деди Жонон уларни дастурхонга таклиф қилиб. Ер эгалари Жононнинг хушмуомалигини кўриб, ҳовурларидан тушишди. Жонон меҳмон ҳурмати қўй сўйдириб, қозон остирди.

Зиёфат охирида меҳмонларга тўн ёпди ва ўзини танитмай, уларнинг насл-насабини суриштирди.

— Отамизни Бектош дейишади, — деди бирови. — Менинг исмим Ҳундибой, — кейин шеригини таништирди: — Бу — укам Қозоқбой.

Жононнинг баданига олов югурди, ҳаяжонланди. Ахир, унинг қаршисида жиянлари ўтирарди-да. У ўзини босиб олиб:

— Болаларим, — деди меҳрибонлик билан, — сизлар бориб, отангиз ва қишлоқ оқсоқолларини бу ерга бошлаб келсаларингиз, уларга ҳам зиёфат бериб, уларнинг олдида сизларни рози қилай.

Ҳундибой ва Қозоқбой қишлоқ томон кетиши биланоқ Жонон меҳмон кутиш тараддудини кўра бошлади. Яна бир қўй сўйдириб, анвойи таомлар тайёрлатди. Гиламлар ёйиб, бахмал кўрпачалар тўшалди.

Бир ош пишиши вақти ўтиб, қишлоқ томондан меҳмонларнинг қораси кўринди. Жононнинг хизматкорлари пойандоз ёзиб, уларга пешвоз чиқишди. Меҳмонларга иззат-икром кўрсатилди. Зиёфат қизигандан қизиди. Обу овқатдан кейин оқсоқоллардан бири:

— Энди ўзларини танитсалар, — деб Жононга юзланди. — Кимсизлар, қаердан келяписизлар, қаерга кетяписизлар?

Жонон гапни узоқдан бошлади:

— Бир вақтлар, шу қишлоқда Ниёзбек деган бой ўтган экан. Унинг Бектош ва Жонон деган ўғиллари бўлган экан...

Жононнинг ҳикояси охирлаб борар экан, Бектошнинг кўзидан шашқатор ёш оқа бошлади ва укаси Жононни таниди, ҳаммани ҳайратга солиб, ўзини укаси томон ташлади.

— Жонон, жигарим! — деди ҳўнграб. — Аллоҳга шукр, диёдор қиёматда қолди, деб қўрққан эдим! Сени изламаган, сўроқламаган ерим қолмади. Мени кечир, укажон! Гуноҳкор акангни кечир!

— Мен сизни ўша куни кечирган эдим, акажон, — деди Жонон Бектошни бағридан бўшатаркан, унинг

юзига меҳр билан боқиб. — Сизда гуноҳ йўқ, мен ёшлик қилдим, холос...

Жонон Боломонотага яқинлашаркан, болалиги ўтган гўшаларни кўриб, ноҳос Руқияни эслади. Хаёлида ҳали ҳам ёш, Руқия ҳам ўша — оҳу кўзлари чақнаб турган, анор юзлари қип-қизил, дуркун қиздай эди. Эридаги ўзгаришни сезган Нуржаҳон, гап нимада эканлигини билди. Чунки унга эри бир неча бор Руқия ҳақида ҳикоя қилиб берган эди.

— Руқия эсингизга тушдими? — деб сўради Нуржаҳон эридан.

— Ҳа, Нуржаҳон, уни эсладим, — деди Жонон хўрсиниб. — У мени келганимни эшитдимикан? Эшитган бўлса, не куйга тушди экан?

— Агар то ҳануз турмуш қурмаган бўлса, никоҳингизга оласизми?

— Нималар деяпсан? Орадан не-не сувлар оқиб ўтмади. Шу пайтгача турмуш қуриб, бола-чақали бўлиб кетгандир...

Жононнинг қайтиб келган дарагини эшитган қариндош-уруғ, қўни-қўшни бир ҳафтача Бектошнинг остонасини босишди. Жонон ҳовлига кириб келган ҳар бир нотаниш аёлга синчиклаб қарар, «Руқия эмасмикан», деб юраги ҳапқирарди.

Келиб-кетишларнинг кети камайгач, минг истиҳола билан янгасидан Руқия ҳақида сўрашга жазм этди. Янгаси бажонудил унинг сўровига жавоб берди:

— Руқия ҳақида эшитганим бор, — деди янга оғир тин олиб. — У сизни узоқ кутди. Ҳатто унаштирилган йигитига ҳам турмушга чиқмади. Кейин ҳам уни сўраб кўп совчилар келди, «суйганим бор» деб розилик бермади. Ота-онаси ўлиб кетишгач, ёлғиз қолди. «Ёлғиз аёлнинг битта уйда бир ўзи қолиши хосиятсиз», дея қариндошлари уни касалманд бир кишига никоҳлаб беришди. У киши ҳам кўп яшамади, икки йилдан кейин бандаликни бажо келтирди. Руқия ундан бир қиз кўрди. Эри ўлгач, шу қизга суяниб қолди.

— У ҳозир қаерда? — савол берди Жонон.

— Ўша, отасидан қолган ҳовлида, — деди янга. — Анча ўзини олдириб қўйган, касалманд.

— Уни чақиртириб келишнинг иложи борми?

— Нега иложи йўқ экан, бор, ҳозир келинимни юбортираман...

Руқия Жононнинг қайтиб келганини эшитган эди, лекин бориб кўришга истиҳола қилар, Жононнинг ўзи кириб келишини кутарди. Бектошнинг келини чақириб келганидан кейин, қизини қаватига олиб, Бектошникига чиқди.

Жонон меҳмонхонада ўтирарди. Эшикдан сочлари оқарган, бели букчайган, юзларига қат-қат ажин тушган кампир бир қиз етовида кириб келганда, рости Жонон аввалида танимади. Кўз кўзга тушгач, бу Руқия эканлиги аён бўлди. У Руқия билан илк учрашгандагидек, тили калимага келмай, довдираб ўрнидан турди.

— Ё алҳазар, сен ўша Руқиямисан?

Аёл ерга қараганича бош ирғади. Ҳар қандай қайғуга бардош бера оладиган Жононнинг бу муштипар, вафодор аёл қаршисида кўзларидан тирқираб ёш чиқиб кетди.

— Руқиям, сенинг олдингга мен бир умр қарздорман. Сенинг тақдирингдаги кўргиликлар учун жавобгарман. Ҳар бир ишнинг охири бахайр бўлсин. Ҳали ҳам олдимизда яхши кунлар кўп. Айт-чи, бу сенинг қизингми, исми нима?

Аёл бош ирғаб қизининг исмини айтди:

— Раҳима.

Руқия ўтирганида янада букчайиб ўтирарди, унинг қарашларида «менинг шу ҳолга тушишимга сен айбдорсан», деган ифодани уқиш мумкин эди.

— Руқия, на илож, тақдиримиз айро бўлди. Мусофир юртларда қанча кезмайин, ҳар доим сен ёдимда бўлдинг... Қизинг неча ёшда?

— Ўн еттига кираяпти, — чуқур хўрсиниб жавоб берди аёл. Уларнинг суҳбат мавзуси ўзи ҳақида бораётганини сезган қиз ташқарига чиқиб кетди.

Жононнинг ҳали-ҳамон барваста, мош-гуруч соқоли ўзига ярашиқли эди. Қимматбаҳо матодан тикилган

чакмони уни янада салобатли кўрсатарди. Ҳозир иккаласининг олдига кириб келган бегона одам, она-бола суҳбатлашиб ўтирибди, деб хаёл қиларди.

— Кенжа ўғлим Нодирбек ўн тўққизга кираяпти. Ҳали уйлантирганимиз йўқ. Онам раҳматининг нияти рўёбга чиқиб, руҳи шод бўлсин. Агар қизингни боши очиқ бўлса, келин қилайин.

Аёл бундай таклифни кутмаган шекилли, бир зум Жононга қараб қолди. Унинг юзидан бирор бир маънони уқиш қийин. Лекин у бу таклифдан унчалик хурсанд эмас эди. «Бир вақтлар уйланаман деб мени шу куйларга солдинг. Энди қизимга қандай оғиз солаясан? Сизлар бизнинг тенгимиз эмас-ку, мени тинч қўйинглар», деб қалби нола чекарди.

— Йўқ, йўқ, — бошини сарак-сарак қилди аёл. — Бўлмайди, тенг-тенги билан деган гап бор. Эртага қизимни «пастсан» деб камситишларига чидолмайман.

— Руқия, янганг жуда мулоҳазали аёл. У сен ҳақингда билади. Ҳеч қачон қизингни хафа қилдириб қўймаймиз. Ўғлим ҳам одобли, гарчи бадавлат бўлсак-да, камтар йигит. Иншооллоҳ, улар бахтли бўлади. Биз эришолмаган орзуларга фарзандларимиз етади.

— Мен нима ҳам дер эдим. Отасининг укалари бор. Ўшалар нима деса шу бўлади. Ҳозиргача мен уларга суяниб яшадим. Қизимнинг ихтиёри қайниларимнинг қўлида, — деди аёл кутилмаган таклифдан эсанкираб.

— Хўп, эртага совчи юбораман. Ҳаммаси яхши бўлади! — Жонон аёлнинг қаршисида гуноҳқордек ўтирар, нима деб унинг кўнглини кўтаришни билмасди. Бир неча сониялик хижолатпазликдан сўнг, Жонон мавзунини бошқа томонга буриб юборди...

Қиссамиз яхшилик билан тугади. Раҳима билан Нодирбекнинг тўйи етти қишлоққа овоза бўлди. Жонон ҳовли-жой қилди, неваралар кучоғида қарилик гаштини суриб, муродига етди.

Азиз ўқувчи! Бўлиб ўтган воқеалар ҳақиқатан ҳам яқин ўтмишда, Фориш томонларда бўлиб ўтган. Нодирбек билан Раҳимадан Элқул, Шомурод исмли ўғиллар туғилган. Булардан туғилган фарзандлар ҳозирги кунда Жиззахнинг Фориш ва қўшни Сирдарёнинг туманларида эл-юрт хизматида бўлиб, умргузаронлик қилмоқдалар.

Адабий-бадиий нашр

Ҳалима Маликова

ИККИ ҚАЛБ ҚИССАСИ

Қисса

Масъул муҳаррир *Муҳаммад Исмоил*
Муҳаррир *Илҳом Зойир*
Дизайнерлар *А.Сулаймонов, Н.Зокиров*
Техник муҳаррир *Татьяна Смирнова*
Мусахҳиҳ *Доно Тўйчиева*
Компьютерда саҳифаловчи *Зарифа Маннопова*
Муқовада мусаввир *Ортиқали Қозоқов*
расмидан фойдаланилди.

ИБ № 4560

Босишга 02.08.07 й. да рухсат этилди. Бичими 84x108^{1/32}.
Таймс гарнитураси. Офсет босма. 3,78 шартли босма тобоқ.
5,0 нашр тобоғи. Жами 1000 нусха. ...рақамли буюртма.
99—2007 рақамли шартнома. Баҳоси шартнома асосида.

Ўзбекистон Матбуот ва ахборот агентлигининг
Ғафур Ғулом номидаги нашриёт-матбаа ижодий уйи.
100129. Тошкент, Навоий кўчаси 30.
100128. Тошкент, Усмон Юсупов кўчаси, 86.

Бизнинг сайт: [www. iptdgulom.uz](http://www.iptdgulom.uz)